

## **Me Je i Jon Jaqen Aqunec Je**

Me je i cel dana bahic jaqen eu je oso qee nijel. Euqa Jon uqa me je i jaqen. Malogom oso Jisas uqa culaug ona eu Jon. (Age 13.23, 19.26, 20.2, 21.7, 20, 24 feiga.)

Me je ina Jon uqa Anutna Je cebac bileceb catanena eu Jisas, odocob Cebac Bilec Catanec Je eu dana deweg ibuldumei ege gemona jo cehi bilen ec jaqen (1.14). Jon uqa dana cajaca age Jisas uqa Anut Melah eunu dumeig uqanu wawaga meleigiannu gale dona. Odimei Jisas uqa Anutna Kraiis uqa Anutna dana caha-haadecnu wele nesili ehuden eunuha dana cajaca wawaga meleigiannu gale dona. Dana cajaca age Jisasnu wawaga meleeceb uqa ijanna cebac bilec oqagan ec jaqen. (Age 20.31 feiga.)

Jon uqa Anutna Je cebac bileceb catanena eu Jisas ec casac jaqimei Jisas uqa kobolkobol odoc filfil odon eunu jaqen. Kobolkobol odon eu Jisas uqa Anut Melah, uqa Anutna Kraiis eunu ihacena. Odimei Jon uqa Jisas kobolkobol odon eu agena gugnu sildiaden. Odimei saen euna dana cajaca leih age Jisasnu wawaga meleeceb toodoin, euqa leih Jisasnu wawaga qee meleel ec jaqen.

Jon uqa dac 13-17na Jisasna cad age uqa hewoqaga bili odoin witic euna Jisas uqana malogomca sab jejegin Jisas cesuladecnu je maaden ec jaqen. Jaqec je hedocob Jon uqa age Jisas hewudi

gesildumeig na babalecna tuitu qocobil cal men, odimej Jisas ceseli cajimej uqana malogomnu camasac calen ec jaqen.

Me je ina je leih eu ben nijia, eu odi. Je oso eu cebac bilec (1.4). Jisas uqa cebac bilec dana cajaca adena (10.28), odimej cebac bilec eu Jisas (14.6). Je oso eu fulacdoc (1.4). Dana cajaca agena fulacdoc eu Jisas (8.12). Je oso eu je qasali madec (1.7). Wa Joadec Jon uqa Jisasnu je qasali maaden (1.6-9). Je oso eu wawaga meleec (1.7, 20.31). Je oso eu mele gug. Mele gug eu Jisas (14.6). Je oso eu Anut Melah. Anut Melah eu Jisas (1.49), odocob Jisas uqa gaid Anut “Mei,” en.

*Je Dunuhnu Dado Mec*

1. Aqunec je (1.1-18)
2. Jisas uqana cabi oc sanan men (1.19-51)
  - A. Wa Joadec Jon, Jisas aqunidoc, uqana cabi on (1.19-34)
  - B. Jisas malogom 4-pela ceden (1.35-51)
3. Jisas dana cajaca amagana cabi on (dac 2-11)
  - A. Uqa wa odocob wain ibuldon (2.1-11)
  - B. Uqa tempel jo soidon (2.12-25)
  - C. Uqa Nikodimasca je madesin (3.1-21)
  - D. Wa Joadec Jon Jisasnu qasali madeceb malogom age Jisasca belein (3.22-4.3)
  - E. Jisas Sameria hatuna cocobon Sameriadec cajaca je madesin (4.4-42)
  - F. Jisas uqa kingna cabi dana oso eu melah me muden (4.43-54)
  - G. Uqa Jerusalem Juda agena sab ben jecnu ono nuen (dac 5)
  - H. Uqa dana 5,000 sab adimej cebac bilecnu bred eunu je iwaladen (dac 6)

- I. Uqa Jerusalem talah jo sab jec benna ono nuen (dac 7-8)
- J. Uqa dana ameg galuc mec calen eu me muden (dac 9)
- K. Uqa sipsip cofadec me bahic galolo je maaden (10.1-21)
- L. Uqa Jerusalem wele tempel eeldoin deel eunu cisdocnu ceguleinna ono Juda danaca fee dadanein (10.22-39)
- M. Uqa Peria hatuna cabi on (10.40-42)
- N. Uqa Lasaras cal mecnadec tulidocob cajan (dac 11)
- 4. Deel 6-pela hedocob Pasowa Sab Jec Ben Deel caligiannu ninijen Jisas uqa age qocobil cal migiannu Jerusalem ono nuen (dac 12-19)
  - A. Maria uqa mool dedemanca Jisas jaihna basecdu qon (12.1-11)
  - B. Jisas uqa kingwe Jerusalem dunuh len (12.12-19)
  - C. Grik dana leih age Jisas walein (12.20-36)
  - D. Juda dana cajaca mati bahic age Jisasnu wawaga qee meleel (12.37-50)
  - E. Jisas uqa uqana malogom isi culadigen ec maaden (dac 13-17)
    - 1. Jisas Pasowa sab jecna uqana malogom je maaden (dac 13-14)
    - 2. Jisas Getsemani Cabina nunuen uqana malogom je maaden (dac 15-16)
    - 3. Jisas uqadodocnuca, uqana malogomnuca, dana cajaca uqanu wawaga meleigian eu cunugnuca Anut inondon (dac 17)
  - F. Judas uqa Jisas cad ebenegana mudeceb age Jisas hewudein (18.1-12)

G. Age Jisas gesildoin (18.13-19.15)

H. Age Jisas na babalecna tuitu qocobil cal meceb uqa heel cisein (19.16-42)

5. Jisas ceseli cajen (20.1-29)

6. Buk i uqana gug (20.30-31)

7. Cit qoc je (dac 21)

### *Cebac bilecnu je*

<sup>1</sup> Wele gug qocna sao mahaca qee ifanecna je eu wele bilen. Je eu uqa Anutca bilen. Je eu Anut ijom.

<sup>2</sup> Gug qocna bahic je eu uqa Anutca bilen.

<sup>3</sup> Je euna dih Anut ceteteh cunug ifanen. Ceteh oso uqaca qee Anut ifanen eu qee bilel.

<sup>4</sup> Je eu uqa cebac bilecnu gug. Cebac bilec eu dananu fulacdoc iletan.

<sup>5</sup> Fulacdoc eu tuna fulacdona. Odocob tu eu fulacdoc cafuli qelecwe qee.

<sup>6</sup> Anut uqa dana oso suldocob hon, ijan eu Jon.

<sup>7</sup> Uqa dana cajaca me je qasali maadecnu hon. Uqa fulacdocnu qasali maadeceb uqa umna fulacdoc eunu wawaga meleigiannu hon.

<sup>8</sup> Dana eu uqadodoc fulacdoc qee, uqa fulacdocnu qasali maadecnu hon.

<sup>9</sup> Fulacdoc mele bahic dana cajaca cunug wawaga fulacadena eu mahana cali hugia odon.

<sup>10</sup> Aria, je eu mahana bilen. Anut uqa je euna maha ifanen qa dana cajaca cunug mahana bilein age uqanu qee doloin.

<sup>11</sup> Uqa uqana gunna cali hon euqa uqana eundec age uqa qee oidelein.

<sup>12</sup> Euqa leih age uqa oidein age uqa ijannu wawaga meleen. Eunu uqa Anutna mel ibuldocnu gagadic odoc aden.

<sup>13</sup> Age Anutna mel cali hoin eu dana gale adecnafo, age dewenega gale docnafo anagail memegail golanagana qee basadelein euqa Anut uqadih odocna cali hoin.

<sup>14</sup> Je eu dana deweg ibuldumei ege gemona jo cehi bilen. Uqa Anut amegna me bilecca mele bilecca am bec. Ege uqana kobolkobol fom. Kobolkobol eu Memige Anut Melah osol uqana, Memige Anut uqa suldocob nen.

<sup>15</sup> Jon uqa uqanu je qasali madi utael, “Ija qee cali hoc bibiligin uqa wele bilen. Eunu dana inu ija mamadi maadem, ‘Uqa ija hib tooti hona eu ija wooltec,’ adem,” en.

<sup>16-17</sup> Anut uqa loo je Moses umna igen qa Anut uqa amegna me bilecca mele bilecca eu Jisas Kraiss umna igen. Eunu uqana Anut amegna me bilec am bec eunadec ege cunug eelgen. Eeldoc me bahic eu filfil igen.

<sup>18</sup> Dana oso Anut qee fel. Anut Melah osol, eu uqaha Anut, uqa Memige Anut wowogonu bilina, uqa Anutnu mageceb dom.

### *Wa Joahec Jonna je*

*(Matju 3.1-12; Mak 1.7-8; Luk 3.15-17)*

<sup>19</sup> Jon uqana qasali maadec eu odi. Juda agena ilo dana Jerusalemdec age dana leih ihanec danaca Liwaica suladecebil Jonca li sisildu madoin, “Hina in?” doin.

20 Odocobil Jon je qee jahunadel qa uqa camasac qasali maaden, “Anutna Kraiss\* eu ija qee,” aden.

21 Odocob age sisildoin, “Odiqa eeta odeia? Hina Ilaijafo?” doin.

Odocobil uqa jejenega hewi maaden, “Qeeo, ija Ilaija qee,” aden.

Odocob age sisildoin, “Hina je hahun madec dananu ege sumuduquna eufo?” doin.

Uqaqa jejenega hewi maaden, “Eu qee,” aden.

22 Odocob age haun sisildoin, “Odi qeeffi hina in bahic magaga. Dana age sulgecebil hoqa eu hinadodocnu cel je magecem ege ageca ceseli li maadecnu madoqona,” doin.

23 Odocobil Jon jejenega hewi maaden:

“Ija jejeg oso uqa wadauna† bibili utai maadena, ‘Tibudna jic tutuc mudeiga!’ adena.

Eu odi weleca je hahun madec dana Aisaia uqa maden,” aden. *(Aisaia 40.3)*

24 Aria, dana age Jon sisildoin eu Farisi suladecbil hoin.

25 Odocob age Jon sisildoin, “Hina Anutna Kraiss qeeffi, hina Ilaijaha qeeffi, hina je hahun madec dana euha qeeffi eetanu dana cajaca wa joadagana?” doin.

26 Odocob Jon jejenega hewi maaden, “Ija wana wa joadigina qa age gemona dana oso bilia eu age qee dogina.

---

\* **1:20:** Kraiss eu dana Anut uqana dana caja cahahaadecnu wele nesili ehuden. † **1:23:** Age je Matju 3.1na nijia eu feiga.

27 Eu uqa hib tooti hugian. Ija uqana cabi dana me bahic ihoc qee, ija uqa jaih tacec cufalitocwe qee,” aden.

28 Ceteteh i cunug Betani jobon Jodan wa naha ono isecna calen. Ono Jon dana cajaca wa jojoaadien.

### *Jisas uqa Anutna Sipsip Nag*

29 Deel osona Jon uqa Jisas uqaca hohon fime maaden, “Feiga, Anutna Sipsip Nag ihen. Uqa dana cajaca cunug mahana bilegina agena silail cagasiadecnu hon.

30 Dana inu ija wele maadem, ‘Ija qee cali hocna uqa bilen. Eunu dana oso ija hib tooti hona eu ija wooltec,’ adem.

31 Ijadodoc uqanu bahic qee dolom qa Isrel dana cajaca uqanu doqagannu ija wa jojoaadiem hom,” aden.

32 Odime i Jon uqa je iha qasali maaden, “Ija Kis Gun cuhudid cinigwe sao jobonnadec ni uqaca bibilen fem.

33 Ijadodoc uqanu qee dolom qa Anut ija dana cajaca wana wa joadecnu sulteceb hom eu uqa maten, ‘Hina Kis Gun nime i dana osoca bibileb fimeg eu uqa Kis Gunna wa joadigian,’ ten.

34 Eu oodon femnu dana i uqa Anut Melah eunu wele qasali maadem,” aden.

### *Jisas malogom 4-pela ceden*

35 Deel osona Jon uqa uqana malogom lecis gami tawein.

36 Tataweig uqa Jisas cocobi nunuen fime maalen, “Fesia, Anutna Sipsip Nag ihen!” alen.

37 Odocob malogom lecis eu ale odi maaleceb dosin eunu ale Jisas todocobil belein.

38 Bebeleig Jisas gaalimei eu ale toodosin facialimei sisilalen, “Eeta walesina?” alen.

Odocob ale Jisas jejeg hewi madosin, “Rabai, (uqana gug eu ‘Iwaladec’) hina cel jona nijigina?” dosin.

39 Odocobil maalen, “Belimeb fesiale,” alen. Odocob ale uqaca belimeig uqa bibilen fimesi eu wesu 4 kilok odinu deel eu uqaca bilein.

40 Dana lecis ale Jon uqa Jisasnu maalen dah mimesi Jisas toodosin eundec oso eu Andru, uqa Saimon Pita waliag.

41 Odocob uqa Jisas cuculdi limei uqa waliag Saimon gulucdumei madon, “Ege wele Mesaia gulucdoqan,” don. (“Mesaia” uqana gug eu Anutna Krais uqa Anutna dana caja caha-haadecnu wele nesili ehuden.)

42 Odimei uqa ehudeceb Jisasca hosin.

Odocobil Jisas uqa Pita mecidudu madon, “Hina ijain Saimon, Jon melah. Hibna age Kifas hoqagan,” don. (“Kifas” eu Aram jena. Age Grik jena falicdocobilfi eu “Pita.”)‡

### *Jisas uqa Filip Natanielca utaaaleceb toodosin*

43 Deel osona Jisas Galili hatu ono nuigia bili caji nuen. Nuimei uqa Filip gulucdumei madon, “Hina ija tootaga!” don.

44 Filip uqa Betsaidadec, eu Andru Pitaca alena jobondec.

45 Odocob Filip uqa Nataniel gulucdumei madon, “Moses uqa loo jenaca je hahun madec

---

‡ 1:42: “Kifas Pitaca” alena gug eu “meen.”



dana ageca dana oso cali hugiannu jaqein eu ege gulucdoqan. Uqa Jisas Nasaretdec, Josef melah,” don.

<sup>46</sup> Odocob Nataniel sisildon, “Cel cete me oso Nasaretdec hugianfo?” don.

Odocob Filip madon, “Ono limeu fegan,” don.

<sup>47</sup> Odocob Jisas uqa Nataniel uqaca hohon fimeu uqanu maaden, “Feiga, eu dana Isreldec bahic, uhulec oso uqa waugna qee nijel!” aden.

<sup>48</sup> Odocob Nataniel uqa Jisas sisildu madon, “Hina adi ija dumaninu dumeg madagana?” don.

Odocob Jisas jejeg hewi madon, “Filip qee li mahec ninijen hina na dan saluna bibilegen mecihem,” don.

<sup>49</sup> Odocob Nataniel uqa Jisas jejeg hewi madon, “O Meca, hina Anut Melah! Hina Isrel agena king!” don.

<sup>50</sup> Odocob Jisas madon, “Hina na dan saluna bibilegen mecihem ec mahigannu wawin meleenafu? Hina isi cete qila fagana eu wooldoc cetete caloqagan eu fegan!” don.

<sup>51</sup> Odi madumei maaden, “Ija je mele maadigina, age sao jobon hudec tataweb Anutna ensel age Dana Melahca toni tobi eebil foqagan,” aden.

## 2

### *Kena jobon ono dana oso caja on*

<sup>1</sup> Tu lecis hedocob Kena jobon Galili hatuna dana oso caja ocobocobecnu agena kobol toodu

cegulimeig sab wainca jein. Jisas anag Maria uqaha ono li bilen.\*

<sup>2</sup> Euha Jisasca uqana malogom gami ono hoqagannu je sulduadecebil ageha hu bilein.

<sup>3</sup> Bibilegin wain jecnu qee meceb Jisas anag uqa madon, “Agena wain qee meia,” don.

<sup>4</sup> Odocob Jisas uqa anag jejeg hewi madon, “Au, hina eetanu odi matagana? Ijana saen eu qee hoc nijia,” don.

<sup>5</sup> Odocob Jisas anag cabi dana maaden, “Uqa cel je maadeceb eu toodu odoigale,” aden.

<sup>6</sup> Aria, ono age wa halon meenna mudec 6-pela mecebil tawoloi. Juda dana dewenega soidocnu kobol Mosesna loo je nijen eu odocnu meen halon tawoloi. Meen halon osolosol age wa 100 lita odi ilanocnu ihoc.

<sup>7</sup> Odocob Jisas cabi dana maaden, “Age meen halon eu wa o daneiga,” aden. Odocob age meen halon wa o danecebil bi am ben.

<sup>8</sup> Odimej maaden, “Qila wa naha wetimeig sab cilec cofdoc ehi li utecebil jeia,” aden.

<sup>9</sup> Age odi odocobil wa eu wain ibuldon eu uqa ji fen. Uqa wain anadec eu qee dol, cabi dana wa wetein eu ageqa doin. Odocob sab cilec cofdoc eu uqa dana caja oc eu utadocob hocob

<sup>10</sup> madon, “Dana cunug age wain me bahic casac adecebil jegina, me eu geh ji hedocobil hibna me bahic qee eu adecebil jegina. Hinaqa me odoga, hina wain me bahic gesac mimeg qila i hewi ahoga!” don.

---

\* **2:1:** Jisas kobolkobol odonnu je mati eu Jonna bukna nijen. Age 2.11ca, 2.23ca, 3.2ca, 4.54ca, 6.2ca, 6.14ca, 6.26ca, 9.16ca, 11.47ca, 12.18ca, 12.37ca eu feiga.

<sup>11</sup> Eu Jisasna kobolkobol odoc matu eu Kena jobon Galili hatu ono odon. Eu odocna uqa uqana kobolkobol ihacaden. Odocobnu uqana malogom uqanu wawaga meleen.

<sup>12</sup> Eu hedocob Jisasca, anag waliagulca, malogom gami Kapaneam jobon ni belein. Odimeig deel leih ono bilein.

*Jisas uqa idadec dana tempelnadec ititacaden  
(Matju 21.12-13; Mak 11.15-17; Luk 19.45-46)*

<sup>13</sup> Aria, Juda agena Pasowa Sab Jec Ben Deel cali hugia oodon, Jisas Jerusalem ono ten.†

<sup>14</sup> Jisas uqa tempel dunuhna dana age idadeegin gulucaden. Age bulmakauca, sipsipca, cuhudidca fafajegin dana ageha meen qaig wadacwuducdogin feciaden.

<sup>15</sup> Odimeu uqa halu matica cedimeu luc cubusimeu danaca, sipsipca, bulmakauca, tempelnadec qisaaadi ititacaden. Uqa meen qaig wadacwuducdoc dana agena cabal suli qeleceb agena qaig golodon.

<sup>16</sup> Odimeu uqa cuhudid fajec dana maaden, “Meina jo idadec cudun cain muduwain! Ceteteh i cedadi ehi beleiga,” aden.

<sup>17</sup> Jisas uqa odi odocob uqana malogom age Anutna jaqec jena je oso nijia cisdoin eu odi, “Hinana jonu ija deweni ninijec eu ji hedona,” en.

*(Buk Song 69.9)*

<sup>18</sup> Jisas odi odocob Juda dana age Jisas sisildoin, “Hina odi odocnu nijiafo eu cel kobolkobol odoc ihacgecem feqan?” doin.

---

† **2:13:** Age je Mak 14.1na nijia eu feiga.

<sup>19</sup> Odocab Jisas jejenega hewi maaden, “Age tempel i wagalecebil tonecebfi ija deel cijedna haun cehigen,” aden.

<sup>20</sup> Odocab Juda dana age sisildoin, “Tempel i cehecnu sanan mimeig cabi oogin cabi gel 46 ihoc leceb hedumeig culein. Hina adi deel cijednadih tempel haun cehegan?” doin.

<sup>21</sup> Euqa Jisas tempelnu qee madel, eu uqa dewegnu maden.

<sup>22</sup> Eunu hibna uqa cal mecnadec ceseli cajeceb uqana malogom age Jisasna je inu dahiniga fogo docob age Anutna jaqec jenuca, Jisas je maden eunuca wawaga meleen.

### *Jisas uqa dana cunug dumanaga wele don*

<sup>23</sup> Odocab Jisas uqa Jerusalem ono Pasowa Sab Jec Ben saen bibilen dana matica age uqa kobolkobol oodon fimeig uqa ijannu wawaga meleen.

<sup>24</sup> Euqa Jisas uqa dana cunug dumanaga don. Eunu uqa dana eundecnu deweg qee nijel.

<sup>25</sup> Jisas uqadodoc dana wawaga dunuhna nini-jen don. Eunu uqa oso uqa hu dana agena gugnu je mateceb dugen odi madecnu qee nijel.

## 3

### *Jisas Nikodimasca je madesin*

<sup>1</sup> Ono Juda agena ilo oso ijan Nikodimas bilen. Uqa Farisi am eundec oso.

<sup>2</sup> Dana eu witic osona uqa Jisasca humei madon, “O Meca, hina kobolkobol odogona eu oso odocwe qee, euqa oso Anut uqaca bilecebfi

eu odocnu ihoc. Eunu hina iwalgec dana Anut sulheceb hom eu ege doqona,” don.

<sup>3</sup> Odocob Jisas uqa jejeg hewi madon, “Ija je mele mahigina, oso uqa haun qee basudecebfi uqa Anutna cul qee feiaun,” don.

<sup>4</sup> Odocob Nikodimas sisildon, “Dana ben mi hedocob eu adi haun basudigian? Uqa anag waug dunuh leceb haun basudecwe qee!” don.

<sup>5</sup> Odocob Jisas jejeg hewi madon, “Ija je mele mahigina, oso uqa wanaca kishaca qee basudecebfi uqa Anutna cul dunuh lecwe qee.

<sup>6</sup> Oso dana cajaca gug tatawi basecebil cali hona eu dana deweg cebac ona. Oso Kis baseceb cali hona eu kis cebac ona.

<sup>7</sup> Ija age cunug haun basadecnu ec mahiga eunu cain tumatumaagaun.

<sup>8</sup> Fufu uqa ana isec nuigiannu gale dona eu odi nuina. Hina uqa fulufuleceb tebandogona qa anadec hona, ana nuina hina qee dogona. Dana cunug age kis basadeceb cali hogina euha odi bahic,” don.

<sup>9</sup> Odocob Nikodimas sisildon, “Ceteh i mataga eu adi cali hugian?” don.

<sup>10</sup> Odocob Jisas jejeg hewi madon, “Hina Isrel agena iwaladec osoqa, hina eu qee dogona, eu adi?”

<sup>11</sup> Ija je mele mahigina, ege doqona eunu maadoqona, ege fom eunu qasali maadoqona, euqa egena qasali maadec docnu culegina.

<sup>12</sup> Ija ceteh mahanadecnu maadecemin wawaga mele qee el. Ija ceteh saonadecnu maadeceminfi adi wawaga meleigian?

13 Oso sao jobonna qee ti calel. Dana Melah himec uqa sao jobonnadec toni nen,” don.

14-17 “Anut uqa Melah mahana dana agena silailnu gesiladigiannu suldocob qee nel qa mahana dana cahahaadeceb demico biluqagannu suldocob nen. Odocob Anut uqa dana cunug mahana bilegina nalunuga mimei cunug age uqanu wawaga meleigian eu age qee fadalowain qa age cebac bilec catanec eu oqagannu uqa melah osol himec culiaden. Eunu Moses uqa wadauna\* man sononec ihicon qoc suli u caqusenwe dana cunug age uqanu wawaga meleena eundec age cebac bilec catanec eu oqagannu Dana Melah age odi suli u caqusuqagan,” don.

18 “Oso uqa Melahnu waug meleena eu uqa gesildoc qee gulucdoiaun. Euqa oso uqa waug qee meleena uqa Anut Melah osol ijannu waug qee meleelnu eu uqa wele gesildoc oc bilina.

19-20 Gesiladecnu silig i edi. Fulacdoc mahana wele nen. Dana ageqa age cunug me qee odogina eu age fulacdoc sagagdogina. Odimeig age egena odoc camasac meiaun imeig fulacdocna qee hogina. Eunu agena odoc me qee nijianu fulacdoc eu cewudimeig tuna bilec gawegina.

21 Osoqa uqa mele kobol odona eu fulacdocna hona. Eunu Anut cesuldocob uqa Anutna kobol toodu odona eu dana age camasac foqagan,” don.

### *Wa Joadec Jon Jisasnu qasali maden*

22 Saen eu hedocob Jisas uqana malogom gami Judia hatuna belimeig bilein. Ono bibili Jisas dana wa joaden.

---

\* **3:14-17:** Age je Matju 3.1na nijia eu feiga.

<sup>23</sup> Jon uqaha Aionon jobonna wa mati bahic nijeinnu ono dana wa jojoaadi bilen. Aionon eu Salim jobon ono isec nijen. Dana cajaca uqaca lilliein, uqa wa jojoaadien. (

<sup>24</sup> Saen euna Jon gihacdoc jona qee mudec bibilen.)

<sup>25</sup> Saen euna Jonna malogom age Juda dana osoca age Juda agena kobolnu age dewenega gegehini mecdainnu wa joc oloig eunu togodudu fee dadanein.

<sup>26</sup> Odimeig age Jonca humeig madoin, “Meca, dana uqa wele, hina Jodan wa gesacna ono isec bibilegan, hinaca hon, hina uqanu je qasali magem eu uqadodoc dana wa joadena. Odocab dana cajaca cunug age uqaca legina!” doin.

<sup>27</sup> Odocab Jon jejenega hewi maaden, “Anut uqa sao jobon bilia uqa dana oso ceteh oso qee utecebfi dana eu ocwe qee.

<sup>28</sup> Ija wele maadem, ija Anutna Kraisi qee. Anut sulteceb ija uqana aqunitoc hom eu agedodoc ijanu qasali mamadegin doin.

<sup>29</sup> Dana oso uqa caji ocob dana eu uqa caji eu gemug. Dana caji ona eu uqana danah eu tatawi caji gemug je madeceb dah mimei waug ceel bahic ena. Eunu ijaha qila ijana ceeli bilec ihoc lena.

<sup>30</sup> Uqa ijan eu meca caligian. Odocab ija ijani eu mahana tonigian,” aden.

<sup>31</sup> Dana ohisdec nen uqa dana cunug wooladec ohis bilina. Oso mahanadec hon eu mahanadec dana, uqa ceteh mahana nijia eunu je madena. Euqa oso sao jobonnadec nen uqa dana cunug wooladec ohis bilina.

<sup>32</sup> Uqa wele fifi dudu en eunu je qasali maadena euqa dana cajaca cunug age uqana qasali maadec culegina.

<sup>33-34</sup> Dana eu Anut suldocob nen eu uqa Anutna je madena. Ge, Anut uqana Kis eu ihoc lec utina. Eunu oso uqa ohisdec uqana qasali maadec dah mimei gagadicca hewena eu uqa je sisi mec odi madena, "Anut uqa mele bahic," ena.

<sup>35</sup> Memige Anut uqa Melahnu nalug mena, uqana ceteteh cunug uqa ebenna muden nijia.

<sup>36</sup> Oso uqa Anut Melahnu waug meleena eu uqa cebac bilec catanec eu wele on. Oso uqa Anut Melah je madena eu toodu qee odona eu cebac bilec catanec qee feiaun qa Anutna gemag bec eu uqa deweg fagdona.

## 4

### *Jisas Sameriadec cajaca je madesin*

<sup>1-3</sup> Saen euna Farisi age Jisas uqa Jon wooldoc dana mati bahic uqana malogom ibuldogina, mati bahic wa joadena ec doin. Euqa Jisas uqadodoc dana qee wa joadel, uqana malogom agedih dana wa joadein. Odocob Tibud uqa je eu dumei Judia hatu culdimei Galili hatu ono ceseli nuen.

<sup>4</sup> Aria, uqana jic nuigiannu eu Sameria hatu gemona odi nuen.

<sup>5</sup> Uqa Sameria hatu gemona nuimei uqa taun oso hacna calen, ijan eu Sikar. Sikar isec maha oso nijen, maha eu weleca Jakob uqa melah Josef uqana bahic biligiannu uten.

<sup>6</sup> Ono ha wa hunec oso nijen, eu ijan Jakobna wa hunec. Odocob Jisas uqa jic cobonnu siw



muduga docob uqa wa hunecna isec bilen, saen eu cam tutuc cehec tatawen.

7-8 Jisasna malogom age sab fajoqagannu taun ono wele belein. Odocobil Sameriadec caja oso wa wetigiannu hocob Jisas madon, “Wa wetitaga jiga,” don.

9 Odocob Judaca Sameriaca age sagagdocobdocob bileinnu caja eu madon, “Hina Juda dana, ija Sameriadec, adi wa wetihecnu matagana?” don.

10 Odocob Jisas jejeg hewi madon, “O caja, hina bagol Anut uqa dana caja adena eu doummiqa, hinaha in maheia, ‘Wa wetitaga jiga,’ heia euha doummiqa hina uqa sisildoum, ‘Wa itiga,’ doum, uqa cebac bilec wa oso iheceb joun,” don.

11 Odocob caja uqa madon, “Dana Ben, hina wa wetecnu halonca qee. Wa hunec euha dunuh bahic nijia. Hina cebac bilec wa eu anadec ogan?”

12 Ege jajanige Jakob uqa wa hunec i igen. Uqaca, melahulca, uqana bulmakau sipsipca wa i joloig. Hina uqa wooldoc madaganafa?” don.

13 Odocob Jisas jejeg hewi madon, “Cunug wa i jegina eu age haunhaun wa gab adena.

14 Osoqa wa ija utecemin jigiaqa eu haun wa gab qee doiaun. Wa ija utecemin jigian eu ibuldumei uqa dunuhna cebac wa eu fifiji bibi nijigian. Wa euha cebac bilec catanec ocnu silig tawigian,” don.

15 Odocob caja madon, “Dana Ben, ija haun wa gab teiaunnu, ijaha ene humig wa wetigaunnu wa eu ija itecem jiga!” don.

16 Odocob Jisas uqa caja madon, “Cois, hina limeg gemun madocom ceseli hosiale,” don.

17-18 Odocob caja jejeg hewi madon, “Ija gemunica qee,” don. Odocob Jisas madon, “Hina dana 5-pela cedadem. Qila dana osoca bilesina eu hina gemun qee, eu mele madaga. Eunu hina ija gemunica qee tagana eu tutuc madagana,” don.

19 Odocob caja jejeg hewi madon, “O Dana Ben, hina je hahun madec dana eu dugina.

20 Ege memigeil age aluh ene tawena euna Anutnu cuha foloig, odocob age Juda dana madegina, ‘Jerusalem dih eu Anutnu cuha fecnu cudun,’ egina. Eu adi?” don.\*

21 Odocob Jisas madon, “Caja, ijana jenu wawin meleeiale. Saen oso hona, saen euna dana age Memige Anutnu ene aluhna himec qee cuha fowain, odimeig Jerusalem ono himecha qee cuha fowain.

22 Age Sameria dana cuha fec qa fegina, euqa cuha fegina eu uqana gug qee dogina. Caha-haadec silig eu Judadec cali hona. Eunu ege Juda dana ege cuha foqona, eu uqana gug doqona.

23 Euqa saen oso hugian, saen euha wele hon nijia, saen ina dana mele cuha fegina age Memige Anutnu Kisanca mele jenaca cuha foqagan. Dana eundec Memige Anutnu cuha fegina eu uqa gale dona.

24 Anut uqa kis. Odocob age uqanu cuha fegina eu age kisanca, mele jenaca cuha fec bahic foqagan,” don.

---

\* **4:20:** “Aluh ene tawena” caja uqa eunu maden eu Gerisim aluh, eu Sameria hatuna tawen. Sameria age Gerisim aluhna cuha ben fefeig ihanoqagannu ceguloloig. Age Luk 9.53 feiga.

<sup>25</sup> Odocob caja uqa Jisas jejeg hewi madon, “Mesaia uqa hona, age Kraisa dogina, eu ija dugina. Uqa humei uqa eu odocnu cunug iwalgigian,” don.

<sup>26</sup> Odocob Jisas madon, “Dana eunu madagana eu ija. Ija hina mahigina eu uqa ijom,” don.

<sup>27</sup> Odi madodon uqana malogom cali hoin. Odimeig age Jisas caja ica je mamadesin fimeig tumatumaein. Euqa age hina eeta gale hena, eetanu caja ica je madesina oso qee sisildu fel.

<sup>28</sup> Odocob caja eu uqana wa halon wa hunecna culimei ceseli taun limei ono dana maaden,

<sup>29</sup> “Belimeig wa hunecna dana oso feigale, uqa ija ceteu cunug odom eu qasalteia. Uqa Anutna Kraisa?” aden.

<sup>30</sup> Odocob dana age taun culimeig Jisasca lein.

<sup>31</sup> Lelegin Jisasna malogom age Jisas cesusdudu madoin, “Meca, hina sab jagale!” doin.

<sup>32</sup> Odocob uqa maaden, “Ija sab jec osoca age eunu qee dogina,” aden.

<sup>33</sup> Odocob malogom agedodoc togodudu madein, “Oso hu sab uteceb jeiafo?” ein.

<sup>34</sup> Odocobil Jisas maaden, “Oso sulten uqa madena eu odocnuca, uqana cabi u hedocnuca eu ijana sab jec,” aden.

<sup>35</sup> “Age jagel 4-pela hedocob cabina ceteteu wal meceb cedeqan ec qee madeginafo? Ija maadegina, age didii feiga, cabina ceteteu cedecnu wele wal migia odona!

<sup>36</sup> Oso wele ceteu cehen uqaca, oso wal men eu ceden uqaca osoben wawaga ceeleceb biluqagannu oso uqa cabinadec ceteu wal mec cedimeu

jo bisna mena eu cabinu ameg ona. Odimeu uqa wal men eu cebac bilec catanecna ehi li mudina.

<sup>37</sup> Feiga, ene je oso ihoc lena, je eu ihen, ‘Oso cabi umei ceheceb, oso hu wal meceb cedena,’ je eu ihoc lena.

<sup>38</sup> Ija age ceteu age cabi qee oloin, qee ceheleinca cabi eunadec cedoqagannu suladem. Leih age ono cabi cehein. Ageqa euna limeig agena cabi gagadic odocna cehein euna sab cedeiga,” aden.

<sup>39</sup> Caja uqa Jisasnu qasali maaden, “Uqa ija ceteu cunug ija odom eu qasalten,” aden eunu Sameria taundec dana matica age Jisasnu wawaga meleen.

<sup>40</sup> Eunu Sameriadec age Jisca humeig ninidudu madoin, “Hina nag egeca biluqale,” doin. Odocobil Jisas uqa deel lecis ageca bilein.

<sup>41</sup> Odocob dana cajaca mati age Jisna jenu wawaga meleen.

<sup>42</sup> Odimeig caja eu madoin, “Hina je magem eunu himec wawige meleec qee ihoc lel. Egedodoc uqana je dah mom. Uqa dana cajaca cunug mahana bilegina agena cahahaadec eu ege qila doqona,” doin.

*Jisas uqa kingna cabi dana oso eu melah me muden*

<sup>43-44</sup> Jisas uqadodoc qasali maden, “Je hahun madec dana uqa uqana gug hatuna binanca qee,” en. Eunu uqa deel lecis Sameria gami bilimeig cuculadi Galili hatu ono nui cobon.

<sup>45</sup> Odocob Galili eundec ageha Jerusalem ono Pasowa Sab Jec Ben Deelna nui bilimeig kobolkobol cunug oodon fein. Eunu uqa Galili

hatu ono caleceb uqa feele dumeig ageca bilecnu madoin.

<sup>46</sup> Odocob Jisas uqa haun ceseli Kena jobon Galili hatuna calen. Jobon euna wele uqa madeceb wa eu wain ibuldon. Kapaneam jobon ono kingna cabi dana oso bilen. Uqa melah hag ben umei nijen.

<sup>47</sup> Odocob uqa Jisas Judiadec Galili ene hon ec dumei melah uqa cal migia odonnu uqa Jisasca limei ninidudu madon, “Hina ijaca numeu ija melami me muditagale,” don.

<sup>48</sup> Odocob Jisas uqa jejeg hewi madon, “Age kobolkobol odocca gaga odocca qee fifeig age wawaga qee meleeiaun,” don.

<sup>49</sup> Odocob cabi dana eu Jisas madon, “O Dana Ben, nowale, melami qee cal mec ninijeb ono calowale,” don.

<sup>50</sup> Odocob Jisas madon, “Nugale, hina melem eu cebac biligian!” don. Dana eu Jisasna je waug meleeceb non.

<sup>51</sup> Uqa jobon nunu jicna uqana cabi dana bebegin gulucadeceb madoin, “Hina melem medoia cebac bilia!” doin.

<sup>52</sup> Odocobil uqa sisiladi maaden, “Cel saenna melami hag medoian?” aden. Odocob age madoin, “Eu cum wesu 1 kilokna uqana hag medoian,” doin.

<sup>53</sup> Age madecebil mel memeg uqa saen euna bahic Jisas maten “Hina melem cebac biligian,” ten ec cisdon. Odimeu uqaca uqana eundec cunugca Jisasnu wawaga meleen.

<sup>54</sup> Jisas uqa Judiadec Galili hatu ono limei odon eu kobolkobol odoc lecisdon.

## 5

*Jisas Betesda wa fifji bec gudocna dana oso me muden*

<sup>1</sup> Eu hedocob Juda agena cuha fec deel gun oso cali hugia oodon Jisas uqa Jerusalem ono ten.\*

<sup>2</sup> Aria, Jerusalem meen gel alildocna jic cebec oso nijen, eu ijan Sipsip Jic Cebec. Euna isec wa fifji bec gudoc nijina, eu Aram jena Betesda egina.† Eu qeihna isec jo hamol 5-pela cehec tawen.

<sup>3-4</sup> Jo hamol euna dana caja hagca mati ono nijein. Eu age amaga galuc mecca, laleg mecca, dewenega me qee mecca nijein. [Saen esuesu Tibudna ensel oso ni wa mulodon. Wa mulodocob oso cunug wooladi aquni wana toni wa jacob eu hag medoc on. Hag filfil aqen eu meaden. Eunu age cunug wana mulodoc saennu susumudi nijein.]

<sup>5</sup> Ono dana oso bilen eu hag umei cabi gel 38 ihoc lec gaid hag nijoloi.

<sup>6</sup> Jisas uqa dana eu ninijen fimeu uqa hag saen odi cecelacca nijina dumei sisildu madon, “Hina hag mehecnu gale henafo?” don.

<sup>7</sup> Odocob hag dana eu Jisas jejeg hewi madon, “Dana Ben, ija cesultec oso qee bilina. Wa mulodocob ija mahuc tonecwe qee. Tonecnu

---

\* **5:1:** Jonna buk uqana naha ina Jisas uqa Juda agena cuha fec deel gunnaca, agena cuha fec bennaca ceteteh odon eunu je mati nijia. Age 5.1ca, 5.9ca, 6.4ca, 7.2ca, 10.22ca eu feiga. Doc dana mati age Jon uqa Jisas eu Juda agena cuha fec deel cunugnu gug eu odi ihacadecnu gale don ec cisdogina. † **5:2:** Doc dana mati age wa fifji bec gudoc eu Betsaida ec cisdogina.

odocomin oso mahuc hu woolti tonimej wa jona,” don.

<sup>8</sup> Odocab Jisas madon, “Hina cajimeg hinana taeg umeg coboga,” don.

<sup>9</sup> Mahuc bahic dana hag medocab caji uqana taeg umei jic cobon.

Aria, deel Jisas uqa me muden eu Juda agena cuha deel.

<sup>10</sup> Euqa Juda dana age dana hag medon eu madoin, “Qila cuha deel, hina eetanu hinana taeg gahidogona? Egena loo je eu odi odocnu cain ec madena,” doin.

<sup>11</sup> Odocabil uqa maaden, “Dana uqa me mitia uqa mateceb ijana taeg umig cobigina,” aden.

<sup>12</sup> Odocab age sisildoin, “Dana eu hinana taeg umeg coboga heia eu in?” doin.

<sup>13</sup> Dana mati bahic cudun euna beleinnu Jisas uqa filec isec nuen. Eunu dana hagca eu in uqa me muden eu qee dol.

<sup>14</sup> Hibna Jisas uqa dana eu tempelna cocobon gulucdumei madon, “Faga, hina hag mehen. Cete me qee bahic eu wooldoc hinana hag dewenna hoiaunnu haun silail cain magaun,” don.

<sup>15</sup> Odocab dana eu nuimei Juda dana maaden, “Me miten eu Jisas,” aden.

<sup>16</sup> Odocab Juda dana age Jisas uqa Juda agena cuha deelna eu odonnu aqati toodoin.

<sup>17</sup> Odocab Jisas uqa Juda dana maaden, “Ija Mei gaid cabi oloi, qila ha cabi ona eunu ija ha cabi odi ugina,” aden.

<sup>18</sup> Age madein, “Cuha deelna loo je gadac tefacdon eu himec qee, uqa ha madena, ‘Anut uqa ija

Mei,' ena eunu uqadodoc uqa Anutca ele ihocihoc biluwuna ena," ein. Odi madecebnu age Jisas qocnu geh cisdoin.

*Jisas uqa Anut Melah uqana gugnu Juda dana je maaden*

<sup>19-20</sup> Eunu Jisas uqa Juda dana maaden, "Ija je mele maadigina, Anut Melah uqadodoc dih ceteh oso odocwe qee. Uqa Memige Anut oodon fena eu himec uqa odona. Memige Anut uqa Melahnu nalug mena. Uqa ceteteh cunug uqadodoc odona eu Melah ihacdona. Mele, age fimeig tumatumaogagannu Memige Anut uqa ceteteh qila fegina eu ceteteh wooladec ihacdugian. Eunu Memige Anut odona eu himec Anut Melah odona.

<sup>21</sup> Memige Anut uqa cal mein eundec tuliadimeic cebac bilec haun adenawe, odi Melah osooso uqadodoc cisdoc toodu cebac bilec haun adena.

<sup>22-23</sup> Ge, Memige Anut uqa oso qee gesildona qa cunug age Memige Anut ijan saulal mudeginawe age Melah ijan ha odi saulal muduqagannu, uqa Melah gesiladigiannu cabi cunug culiton. Oso Melah saulal qee mudina eu uqa Memige, uqa Melah suldon, euha saulal qee mudina," aden.

<sup>24</sup> "Ija je mele maadigina, oso ijana je dugiaqa, sulten eu uqana jenu waug meleigiaqa, eu uqa cebac bilec catanec wele on. Uqa gesildocna qee leiaun qa uqa cal mecnadec cebac bilecnana wele leti len," aden.

<sup>25</sup> "Ija je mele maadigina, saen hugian, saen eu wele hon bilia. Saen ina cal mein eundec age Anut Melahna jejeg dah moqagan. Dah mimeig eu age cajimeig cebac biluqagan.



<sup>26</sup> Ge, Memige Anut uqadodoc cebac bilec gug bilina. Odiwe ha uqa Melah cebac bilec gug bilec culiton.

<sup>27</sup> Odocob Melah eu uqa Dana Melah eunu Memige Anut uqa Melah madon, ‘Cois, hina dana cunug gesiladecnu hina ebenna migina,’ don.

<sup>28</sup> Age inu cain tumatumaowain. Saen hugian, saen euna cunug age qalqalna nijegina uqa jejeg dah moqagan.

<sup>29</sup> Dumeig age cali hoqagan. Agena me odoc nijina eundec age cebac bilec catanec oqagan, me qee odoc nijina eundec age gesiladec me qee oqagan,” aden.

*Dana age Jisasnu qasali maaden*

<sup>30</sup> Jisas je haun maaden, “Ija ijana cisdoc toodu qee odigina qa sulten eu uqana cisdoc toodu odigina. Eunu ija cuhanuc ceteh oso odocwe qee. Memige mateceb dah migina eu toodu dana dewenega je ila mi gesiladigina. Deweneganu je eu madigina eu tutuc,” aden.

<sup>31</sup> “Ijanel ijana gugnu je qasali maadiginafi dana age qasali maadec inu meleecwe qee.‡

<sup>32</sup> Euqa oso ijana gugnu je qasali maadena. Uqa ijanu je qasali maadena eu mele je ija dugina,” aden.§

<sup>33</sup> “Agedodoc wele dana sos leih Jonca suladecebil li sisildocobil uqa ijanu je mele qasali maaden.

<sup>34</sup> Euqa ijana gugnu qasali maadec eu dana osonadec qee. Ijaqa je eu Anut age cahahaadecnu maadigina.

---

‡ 5:31: Age Loo 19.15 feiga. § 5:32: “oso” eunu Jisas maden eu Anut.

<sup>35</sup> Jon uqa gowoc, eu ileten. Age saen nag odi fulacdoc uqanadec cali hon euna celeboi cobocnu gale aden,” aden.

<sup>36</sup> “Euqa ceteh oso ijana gug camasac mena eu Jon ijana gugnu je qasali maadec wooldona. Eu ijana odoc Memige Anut uqa odi hedocnu maten, odoc eu ija gaid odigina eu uqa sulten eunu camas mena.

<sup>37</sup> Memige Anut ija sulten, uqadodoc ijana gugnu qasali maaden. Age uqa jejeg qee dah melein, uqa deweg ha qee felein.

<sup>38</sup> Age uqa suldocob hon eu maadeceb wawaga qee meleel. Eunu uqana je ha wawagana qee bili cuhadona,” aden. \*\*

<sup>39</sup> “Feiga, age Anutna jaqec je euna cebac bilec catanec oqan eginanu sasanijii uqana caun megegina. Euqa Anutna jaqec je eu ijana gugnu qasali madena.

<sup>40</sup> Euqa age cebac bilec catanec eu ocnu cemeni hoqagannu culegina,” aden.

<sup>41</sup> “Ija dana binani sulecnu qee madegina.

<sup>42</sup> Euqa agenu dugina, age Anutnu nalug mec eu wawagana qee nijel.††

<sup>43</sup> Ija Mei ijanna ageca hom, eu age ija qee oitelein. Oso uqadodoc ijanna hocobfi age eu oiduqagan.

<sup>44</sup> Age dana filfil age binanaga sulegina qa binanaga caunca osol Anutnadec ageca hocnu nijia eu ocnu wawaga qee hoolena. Euna adi wawaga meleec ihoc ligian?” aden.

---

\*\* 5:38: “uqa suldocob hon” eu Jisas. †† 5:42: Grik jenadec eu falicdocnu je osoha nijia eu odi: “Anut agenu nalunuga mec eu wawagana qee nijel” aden.

<sup>45</sup> “Age ija Memige Anut amegna agenu um qi-gen ec cain cisdownain. Oso uqa age dewenaganu um qona eu Moses, uqa cesuladigian ec cisdogina.

<sup>46</sup> Moses uqa ijanu je jaqen nijia. Eunu age Mosesna loo jenu wawaga meleelialumi age ijana jenu ha wawaga meleoub.

<sup>47</sup> Euqa age je Moses jaqen nijia eunu wawaga qee melecebfi age ijana jenu adi wawaga meleigian?” aden.

## 6

*Jisas uqa dana 5,000 sab aden*

*(Matju 14.13-21; Mak 6.30-44; Luk 9.10-17)*

<sup>1</sup> Eu hedocob Jisas uqa Galili wa gad cagoc leti lan ono isec nuen. Wa gad cagoc eu ageha Taibirias egina.

<sup>2</sup> Eu dana cajaca mati bahic age Jisas dana haggancanu kobolkobol oodon feinnu uqa toodu belein.

<sup>3</sup> Jisas uqa ono aluh osona timei uqana malogom gami ono bilein.

<sup>4</sup> Aria, Juda agena Pasowa Sab Jec Ben Deel wele cali hugia odon.

<sup>5</sup> Jisas uqa dana cajaca mati bahic uqaca hogogin feciadime i uqa Filip madon, “Ege bred age joqagannu ana fajeqan?” don.

<sup>6</sup> Uqa je eu Filip temdu figiannu madon. Uqadodoc odiodi odigen imei bilen.

<sup>7</sup> Odocob Filip madon, “Ege 200 kina odi bred fajiadocomunfi abesabes fan nag himec ocnu ihoc qee leiaun,” don.

<sup>8</sup> Odocob uqana malogom oso Andru, uqa Saimon Pita waliag, madon,

<sup>9</sup> “Mel haun oso ihen bilina, uqana bred 5-pela, cul dool lecisca nijia. Euqa nag bahic, dana matica adi ihoc ligian?” don.

<sup>10</sup> Odocob Jisas maaden, “Age dana cajaca maadecebil bileiga,” aden. Ono gigisac geh bahic nijennu dana euna bilein. Eu age dana 5,000 ihoc len.

<sup>11</sup> Bibilegin Jisas uqa bred eu umei Anut binan sulimei dana bilein eu siwiaden. Odimei cul doolha age jaga adenwe ihoc adecebil jein.

<sup>12</sup> Age cunug ihoc jecebil uqa uqana malogom maaden, “Jecefanaga culeiga nijia eu cain cus-dowain. Cunug cedi gabandoigale,” aden.

<sup>13</sup> Odocob age bred 5-pela jimeig jecefanaga culein eu gabandu cedimeig galel 12-pela tacecebil ihoc len.

<sup>14</sup> Odocob dana cajaca age Jisas kobolkobol eu oodon fimeig madein, “Je hahun madec dana uqa mahana hugian ein eu uqa mele bahic ihen!” ein.

<sup>15</sup> Jisas uqa age hu colowandu hewimeig gagadic mumudi egena king muduqa ecebil fimeig uqa cuculadi cuhanuc aluhna ti bilen.

*Jisas macas tataan cobon*  
(*Matju 14.22-23; Mak 6.45-52*)

<sup>16</sup> Wesu memen Jisasna malogom Galili wa gad cagocna noin.

<sup>17</sup> Odimeig age wag tobimeig ceseli wa gad cagoc leti Kapaneam jobon ono belecnu odoin. Jisas ageca qee hoc ninijen witic men.

<sup>18</sup> Odocob fufu gagadicca hohon wa caji qahen.

<sup>19</sup> Malogom eu age wagna wa gemo 5-pela o 6-pela kilomita odi falandoig age Jisas wa tataan

cocobon wag cemenug hohon fein. Odocob age cucuiein.

<sup>20</sup> Euqa Jisas maaden, “Ija ihen. Age cain cucuiuwain,” aden.

<sup>21</sup> Odimeig age cois uqa wag tobigian ec madecebil mahuc bahic wag eu cudun ono leqan einna wele calen.

*Dana cajaca age Jisas wawali coboin*

<sup>22</sup> Uqadec odi dana cajaca wa gad cagoc hagen naha isec bilein eu age wag osol himec cum odi ono tatawen fein. Age Jisas uqa wag qee tobel qa uqana malogom himec wag tobi belein eu feciadein.

<sup>23</sup> Euqa wag leih age Taibiriasdec age ono sab Tibud uqa Anut binan suleceb jein cudun euna cemenug hoin.

<sup>24</sup> Eunu dana cajaca age Jisasca uqana malogomca age ono qee meciadimeig age wag leih euna tobimeig wa gad cagoc leti Kapaneam jobon ono humeig Jisas wawali coboin.

*Jisas uqa cebac bilecnu bred*

<sup>25</sup> Dana cajaca age Jisas wa cagoc lan ono isec gulucdumeig sisildu madoin, “Meca, hina cel saenna ene hom?” doin.

<sup>26</sup> Odocob Jisas jejenega hewi maaden, “Ija je mele maadigina, age ija kobolkobol oodigin fein eunu qee walitelein qa age bred jimeig wawaga ihoc len eunu walitegina.

<sup>27</sup> Age sab qee migiannu nijia eu cain cabi owain qa age sab eu cebac bilec catanecna gaid bilina eu cabi oigale. Sab eu Dana Melah adigian. Ge, Memige Anut uqa Melahna uqana sisi mec

men. Uqa Melahnu madi maden, ‘Melami ihen, uqa ijana odoc eu odona,’ en,” aden.

<sup>28</sup> Odocob age sisildu madoin, “Ege cel cabi oc oso Anut ege odocnu gale dona eu odeqan?” doin.

<sup>29</sup> Odocobil Jisas maaden, “Oso Anut suldon eu uqanu wawaga meleeiale odoc eu Anut gale dona,” aden.

<sup>30</sup> Odocob age haun sisildu madoin, “Hina cel kobolkobol oso eu odocom ege fimeb hinanu wawige meleigian? Hina cel cabi ogan?”

<sup>31</sup> Ege jajanigeil age wadauna\* manna jein. Ge, Anutna jaqec je eu odi tawena:

‘Uqa sao jobonnadec bred adeceb jein,’ ec tawena,” doin. (*Kisim Bek 16.4; Nehemaia 9.15; Buk Song 78.24-25*)

<sup>32-33</sup> Odocobil Jisas maaden, “Ija je mele maadigina, Anutna bred eu Anut uqa suldocob sao jobonnadec nimei mahana bilegina eundec cebac bilec adena. Eunu Moses uqa bred sao jobonnadec qee adel. Ija Mei uqa sao jobonnadec bred mele bahic adena,” aden.

<sup>34</sup> Odocob age sisildoin, “O Tibud, gaidgaid bred eu igiga joqa,” doin.

<sup>35</sup> Jisas maaden, “Ija cebac bilecnu bred. Oso ijaca hugiaqa haun wen qee doiaun. Oso ijanu waug meleeceb haun wa gab qee doiaun.

<sup>36</sup> Euqa age ija mecitein qa wawaga qee meleel ec maadem.

<sup>37</sup> Dana cajaca cunug Memige Anut itina eu ijaca hoqagan. Oso uqa ijaca hocob eu ija qee ititacdugaun.

---

\* **6:31:** Age je Matju 3.1na nijia eu feiga.

38-40 Ija Mei uqa sulten eu uqana cisdoc eu odi. Cunug age Melah fecidumeig uqanu wawaga meleceeb eu age cebac bilec catanec eu oqagan. Odocob ija cit qoc deelna tuliadecemin caji cebac biluqagan. Uqana cisdoc euha odi. Dana cunug uqa iten eu ija oso qee culdugaun qa ija cunug cit qoc deelna tuliadecemin caji cebac biluqagan. Eunu ijana cisdoc toodu odocnu qee nelem qa uqa sulten eu uqana cisdoc toodu odocnu ija sao jobonnadec toni nem,” aden.

41 Uqa ija bred sao jobonnadec toni nem ec maadeceb Juda dana age gonagona mi madein, “Eetanu uqa madena?” ein.

42 Odimeig age madein, “Dana i uqa Jisas qeefo? Eu Josef melah, uqa anag memegcanu doqona. Eu adi uqa qila madena, ‘Ija sao jobonnadec toni nem,’ ena?” ein.

43-44 Odocobil Jisas jejenega hewi maaden, “Oso uqadodoc ijaca hocnu ihoc qee nijel. Memige Anut uqa ija sulten, uqa himec dana cecel qudocob ijaca hona. Qeefi, oso ijaca hocnu ihoc qee. Eunu age cain gonagona mecebmecebowain. Odocob dana eu ija cit qoc deelna tulidocomin caji cebac biligian.

45 Ge, je hahun madec dana age agena jaqec je odi jaqein:

‘Anut uqa cunug iwaladigian,’ ein. (*Aisaia 54.13*) Age abesabes Memige Anut iwaladeceb doin eu age ijaca hogina.

46 Euqa dana oso uqa Memige Anut qee fel. Oso uqa Anutnadec hon eu uqa himec Memige Anut fen.

<sup>47</sup> Ija je mele maadigina, oso ijanu waug meleena eu uqa cebac bilec catanec wele on.

<sup>48</sup> Ija cebac bilec catanecnu bred.

<sup>49</sup> Age jajanagail wadauna manna jein qa age cal mein.

<sup>50</sup> Euqa bred sao jobonnadec nena eu edi, oso uqa jigian eu uqa qee cal meiaun.

<sup>51</sup> Ija cebac bilec bred eu sao jobonnadec nen. Oso bred i jifei uqa cebac bileceb catanigian. Bred ija adigina eu ija deweni, eu dana mahana bilegina age jimeig cebac biluqagannu bred,” aden.

<sup>52</sup> Odi maadeceb Juda dana age fee dadani madein, “Dana i adi uqa deweg eu jeqannu igigianfo?” ein.

<sup>53</sup> Odocobil Jisas maaden, “Ija je mele maadigina, age Dana Melah deweg golacca qee jifeig age cebac bilec wawagana qee bilel.

<sup>54-56</sup> Ija deweni eu sab bahic, ija golani eu wa gab jecnu bahic. Eunu oso ija deweni golanica jena eu uqa ija dunuhna bilina. Odocob ija uqa dunuhna biligina. Oso deweni golanica jifei uqa cebac bilec catanec uqanu nijia. Odocob cit qoc deelna tulidocomin caji cebac biligian.

<sup>57</sup> Memige Anut cebac bilec gug bilina, uqa ija sulteceb ijaha uqanu cebac biligina. Eu odiwe oso uqa jeitina eu uqa ijanu cebac biligian.

<sup>58</sup> Bred sao jobonnadec toni nen eu ihen. Eu age jajanagail jimeig cal mein cinigwe qee. Oso uqa bred i jigiaqa uqa cebac bileceb catanigian,” aden.

<sup>59</sup> Je eu Jisas uqa Juda agena cuha jona Kapaneam ono iwalaadi bilei maaden.



*Cebac bilec catanecnu je*

<sup>60</sup> Jisasna malogom mati bahic age je eu dumeig madein, “Je eu dudca bahic. In je eu dah mecnu gale dona?” ein.

<sup>61</sup> Euqa Jisas uqa qee dah mec uqana malogom age uqana jenu gonagona memegin dumei maaden, “Se, je eunu wawaga cacaden bileginafo?”

<sup>62</sup> Age Dana Melah wele biloloi euna haun ceseli teteb fifeig age adi cisdoqagan?

<sup>63</sup> Kis uqa cebac bilec adena, deweg ganac uqadodoc cebac qee bilel. Je ija maadiga eu kisca cebac bilecca.

<sup>64</sup> Euqa age gemona leih bilegina age wawaga qee meleec nijia,” aden. Ge, Jisas uqadodoc hahawannadec dana wawaga qee meleec nijia, age uqa uqana cad ebenegana men eu uqa don.

<sup>65</sup> Odimeu uqa haun maaden, “Gug odi nijianu ija maadem, oso uqadodoc ijaca hocnu ihoc qee nijel. Memige Anut odudeceb ijaca hocnu ihoc eu ijaca hugian,” aden.

<sup>66</sup> Je i madecebnu uqana malogom mati age Jisas culdimeig Jisas ceseli haun qee toodu coboloin.

<sup>67</sup> Odocobil Jisas uqa malogom 12-pela sisiladi maaden, “Ageha cuculti beloqaganfo?” aden.

<sup>68-69</sup> Odocob Saimon Pita uqa jejeg hewi madon, “O Tibud, hina cebac bilec catanecnu je magagana. Ege qila hina Anutna Gundec eunu wawige meleena, eu ege du cuhadoqona. Eunu ege inca belecnu?” don.

<sup>70</sup> Odocobil Jisas jejenega hewi maaden, “Ija age 12-pela ijana malogomnu wele nesiladi qee

cedelemfo? Euqa age oso eu Setenna eundec!”  
aden.

<sup>71</sup> Uqa Judas eu Saimon Iskariot melahnu maden. Ge, uqa malogom 12-pela oso hibna Jisas uqana cad ebenegana men.

## 7

*Jisas Jerusalem talah jo sab jec benna ono nui je maaden*

<sup>1</sup> Eu hedocob Juda dana age uqa qoqaga bili odoin eunu Jisas uqa Judia hatuna cobocnu culen. Odimei uqa Galili hatuna lili huhui cobon.

<sup>2</sup> Saen euna Jerusalem ono Juda agena sab jec ben deel oso uqa ijan Talah Jo Sab Jec Ben eu cali hugia odon.

<sup>3-5</sup> Odocob Jisas waliagulha uqanu wawaga mele qee el. Eunu age Jisas madoin, “Oso uqa ijanca bilecnu gale dona eu jahunecna qee cobona. Hina ceteteh i odogona eu dana cajaca amagana camasac odogale! Hinana malogom age hina kobolkobol oodom foqagannu hina cajimeg Judia hatuna nuuga,” doin.

<sup>6</sup> Odocob Jisas uqa jejenega hewi maaden, “Ija odocnu saen qee cali hol euqa age odocnu saen ilag nijia.

<sup>7</sup> Mahanadec eundec age sagagadecnu qee nijel. Euqa ija mahanadec age agena odoc casisic nijia eu amemeg qasal maadiginanu ija sagagte-gina.

<sup>8</sup> Ijana saen qee ihoc lel. Ija cegulec euna qee tigaun. Euqa agedodoc gad sab jec bennu teigale,” aden.

<sup>9</sup> Uqa odi maadimei Galili hatu ono bilen.

10 Euqa uqa waliagul sab jec bennu tecebil uqaha ten. Eu camasac qee cobol uqa jahuni cobon.

11 Juda dana age sab jec bennana Jisas wawali cocobi madein, “Dana eu ana bilia?” ein.

12 Dana cajaca mati bahic age uqanu gehgeh jahjahilein. Leih madein, “Uqa dana me bahic,” ein qa leih madein, “Qeeo, uqa dana cajaca jic cahuldocna iwaladenanu,” ein.

13 Euqa age Juda dananu cucuiimeig uqanu amemeg qee mamadielein.

14 Sab jec ben eu naha isec qee migiannu oodon Jisas uqa tempelna timei iwaladi maaden.

15 Uqa je maadeceb dumeig Juda dana age tumatumai madein, “Meca oso dana i qee iwaldol. Eunu dana i adi loo je jaqec sildiadecnu fena?” ein.

16 Odi madecebil Jisas maaden, “Ija iwaladigina eu ijana je qee, sulten eu uqana je maadigina.

17 Oso uqa Anut madena eu ija toodu odigen ena eu uqa ija madigina eu Anutnadecfo, qee ijanadec eu cel gugnu du cuhadugian.

18 Oso uqa uqana je madena eu uqadodoc binan wasigiannu odona. Osoqa uqa suldon eu binan wasigiannu odona eu uqa je mele madena, uqa uhulec je qee madena,” aden.

19 “Moses age loo je aden. Euqa age eundec oso uqa loo je eu qee toodu odona. Age eetanu ijanu madi qoqan gina?” aden.

20 Odocob dana am age madoin, “In hina qi-hecnu madena? Buga me qee oso hinaca bilia,” doin.

21 Odocob Jisas jejenega hewi maaden, “Ija kobolkobol osol ene odocom age cunug eunu tumatumaegina.

22 Moses uqa age melemegail dewenega cagu qoc kobol eu aden. (Mele, kobol eu Mosesnadec qee qa eu jajanagailnadec.) Odocob eu toodu melemegail cuha deelna dewenega cagu qoginanu.

23 Age Mosesna loo je tefacdoqaun imeig mel cuhana dewenega gaga qoginafi age eetanu ijanu ija dana deweg cunug cuhana me mudem eunu gemanaga bena?

24 Amagana dih fimeig odoc eu me qee ecnuca odoc eu me ecnuca cain gesiluwain. Odocna silig tutuc fimeig eu mefi cois eigale, me qee fimeig eu cois qee eigale, eu odi gesileiga,” aden.

*Dana age Jisasnu madein, “Uqa Anutna Kraisofo?” ein.*

25 Odocob dana leih Jerusalemdec madein, “Dana i age qoqan egina eu uqa qeefo?

26 Feiga! Uqa amemeg tatawi je maadena, oso qee cahacdona! Dana ben age uqa Anutna Kraiso eu mele bahic doginafo?

27 Euqa dana i uqa anadec hon eu ege doqona. Anutna Kraiso hocob uqaqa anadec hon eu oso qee doiaun,” ein.

28 Odocob Jisas tempelna iwalaadei utai maaden, “Mele, age ijanu dogina, ageha ija anadec hom ec doginafo? Euqa ijadodoc ene qee holom. Sultec uqa mele bahic bilina, uqa ija sulten eu age qee dogina.

<sup>29</sup> Ija uqanadec hom, eu uqa ija sulten. Eunu ija uqa dugina,” aden.

<sup>30</sup> Odocob age uqa hewecnu togodoin. Euqa uqana saen qee ihoc lelnu oso uqa hewecnu qee odol.

<sup>31</sup> Euqa dana cajaca am gemogemo mati age Jisasnu wawaga meleec oin. Age madein, “Anutna Kraiss uqa humei uqa kobolkobol odoc dana i odon wooldu odigianfo?” ein.

*Age tempel cofdoc Juda dana leih Jisas hewoqagannu suladein*

<sup>32</sup> Farisi age dana am jahjahili Jisasnu je odi togododogin dah mein. Eunu ihanec dana benbenca, Farisi ageca age tempel cofdoc Juda dana leih Jisas hewoqagannu suladein.

<sup>33</sup> Odogin Jisas uqa dana maaden, “Saen gohic bahic ija age gami bilimig ija sulten eu cemenug ceseli ligen.

<sup>34</sup> Odocomin age ija waltimeig qa qee guluc-tuwain. Ija nuigen euna age lecwe qee,” aden.

<sup>35</sup> Odocob Juda dana age togodudu madein, “Ege uqa qee gulucdoqaunnu uqa ana nuimei biligian? Uqa Juda dana age Grik agena hatuna budu belein bilegina euna nui bilimei Grik dana je iwaladigianfo?

<sup>36</sup> Uqa madena, ‘Age ija waltimeig qa qee guluc-tuwain. Ija nuigen euna age lecwe qee,’ ena je eu cel gug?” ein.

*Jisas uqa cebac bilec wanu maaden*

<sup>37</sup> Sab Jec Ben Deel cit qocna sab jec ben eu uqana deel cunug wooladi saulal mudein, deel

euna Jisas tawi utaadi maaden, “Oso wa gab docob uqa ijaca humei jeiale.

<sup>38</sup> Eu odi Anutna jaqec je madenawe, ‘Oso uqa waugnadec cebac bilec wa eu nigian,’ enawe oso ijanu waug meleena eu uqa odi odigian,” aden.

<sup>39</sup> Jisas uqa je eu Kis Gunnu maden. Saen euna Jisas uqa Anut cemenug uqana kobolkobol ocnu qee tel. Eunu Kis Gun eu age Jisasnu wawaga meleec age oqagan eu Anut qee adel.

*Dana cajaca age am lecis qatanein*

<sup>40</sup> Odocob dana age je eu dah mimeig eundec leih madein, “Dana i uqa je hahun madec dana ege sumuduquna eu mele bahic,” ein.

<sup>41</sup> Odocobil leih madein, “Uqa Anutna Krais,” ein. Euqa leih madein, “Anutna Krais uqa Galilidec hugianfo?

<sup>42</sup> Anutna jaqec je eu Anutna Krais uqa Dewid sihulnadec, Betlehem jobondec ono Dewid bilen eunadec cali hugian ec madena,” ein.

<sup>43</sup> Eunu dana cajaca age Jisasnu wawaga fli-gandu tawein.

<sup>44</sup> Leih age uqa hewecnu cisdoim, euqa oso uqa hewecnu qee odol.

*Juda dana agena iloilo age Jisasnu wawaga qee meleel*

<sup>45</sup> Tempel cofdoc dana ihanec dana ben-benca Farisica suladein eu age ihanec benbenca Farisica gauc ageca ceseli hoin. Odocob agena ben sisiladi maaden, “Eetanu age uqa qee hewi aholoin?” adein.

<sup>46</sup> Odocobil tempel cofdoc dana maadein, “Dana i je madena eu wele oso uqa ihoc qee madel,” adein.

<sup>47</sup> Odocob Farisi age dana eu maadein, “Uqa ageha qauadeiafo?

<sup>48</sup> Juda dana ben osoca, Farisidec dana osoca uqanu wawaga meleenfo? Qeeo!

<sup>49</sup> Dana cajaca am gauc iqa age loo je qee dogina, age Anut geladen bilegina,” adein.

<sup>50</sup> Odi madecebil Farisi dana oso, Nikodimas, uqa wele witic osona Jisasca leceb je madesin, eu uqa maaden,

<sup>51</sup> “Egena loo je odi qee madel, ‘Dana oso gauc gesildoiga,’ el. Uqa madena, ‘Dana oso age um qudegina casac uqa uqana je madeceb gesileiga. Age uqa eeta odon ec sisildu feiga,’ ena,” aden.

<sup>52</sup> Odi madeceb age madoin, “Hinaha Galilidecfo? Loo je jaqec sasaniji megagale. Odimeg je hahun madec dana Galilidec qee hoiaun eu fegan,” doin.

*[Grik jaqec je hilah leihna age but i 7.53-8.11 eu qee nijel.]*

### *Jisas uqa caja oso silailcanu je maaden*

[<sup>53</sup> Odi madimeig qaciti agena gunna beladi hedoin.

## 8

<sup>1</sup> Euqa Jisas Oliw Aluhna nui bilen.

<sup>2</sup> Uqadec qasil walag dadanen uqa tempelna haun nuen. Odocob dana cajaca cunug uqaca hocobil uqa bilimei je iwaladen.

<sup>3</sup> Odocob loo je iwaladec dana Farisica age caja oso ehudi ahoin. Caja eu age uqa gemug culdimej dana oso silail mecnu fanindodon gulucdoin. Age caja eu Jisas amegna mudimeig

<sup>4</sup> madoin, “Iwalgec, caja i uqa dana osoca silail memetin age gulucdoiga.

<sup>5</sup> Egena loo jena Moses maden caja i odeiawe odogina eundec meen qeli agecebil cal meiga ena. Hina eeta madagana?” doin.

<sup>6</sup> Je eu uqa temdocnu madoin. Age uqa je oso Mosesna loo je tefadocnu madeceb dewegnu um qoqan ein. Odocobil Jisas uqa du qahimej ebenna maha gaga qon.

<sup>7</sup> Age haunhaun sisildocobil uqa caji tawimej maaden, “Age oso silailca qee eu li meen hewi caja eu qocnu sanan meiale,” aden.

<sup>8</sup> Maadimej uqa haun bilimej ebenna maha gaga qon.

<sup>9</sup> Jisas je eu maadeceb dumeig age abesabes besibesi belein. Matu casac nueceb oso ageha toodu beladi hedoin. Jisas uqa caja ica lecis himec culalecebil bilesin.

<sup>10</sup> Odocobil Jisas caji tawimej caja sisildu madon, “Dana eu age ana? Oso hina qee gelihelfo?” don.

<sup>11</sup> Odocob caja madon, “Tibud, qeeo, oso qee gelitel,” don. Odocob Jisas madon, “Ijaha qee gelihelim. Nuimeg silail haun cain magaun,” don.]

### *Jisas uqa mahamahanu fuladoc*

<sup>12</sup> Jisas uqa Farisi haun je maaden, “Ija mahamahanu fuladoc. Oso ija tooti cobona eu



uqa tuna qee coboiaun qa cebac bilecnu fulacdoc uqana biligian,” aden.

<sup>13</sup> Odocob Farisi age madoin, “Hina hinadodocnu je qasali madagana! Hinana qasali madec eu meleca qee,” doin.\*

<sup>14</sup> Odocobil Jisas jejenega hewi maaden, “Ija anadec hom, ana nuiginaca eu dugina. Ageqa ija anadec hom, ana nuiginaca eu qee dogina. Eunu ijanelnu je qasali madiginafiqa ijana qasali madecha mele tawena.

<sup>15</sup> Age mahana kobolna dana gesiladegina. Ijaqa dana oso qee gesildugina.

<sup>16</sup> Euqa ija oso uqana odoc eu mefo, qee me qeefo ec madiginafi ija cuhanuc qee je gesiligina. Euqa Memige Anut uqa sulten uqa ijaca je gesiluwuna. Eunu ija je gesilec tutuc madigina.

<sup>17</sup> Agena loo jena je oso nijia eu odi, dana lecis ale dana oso gesiladec jona tawena uqana odocnu je wawala osol qasali madecebilfi alena je qasali madesina eu meleec taweia en.

<sup>18</sup> Ija ijanelnu je qasali madigina. Memige Anut uqa ija sulten uqaha ijanu je qasali madena,” aden.

<sup>19</sup> Odocob age sisildoin, “Hina memen ana bilia?” doin.

Odocobil Jisas maaden, “Age ijana guguca Meinuca qee dogina. Age ijanu doubmiqa ija Meinu ha doub,” aden.

<sup>20</sup> Jisas je eu meen qaig helecnu cudaug euna hamol tatawi tempelna iwalaadi maaden. Euqa uqana saen eu qee holnu oso qee hewi gihacdoc jona mudel.

---

\* **8:13:** Age Loo 19.15 feiga.

*Jisas uqa dana cajaca ija nui biligen euna age belecnu ihoc qee ec maaden*

<sup>21</sup> Jisas uqa je haun ceseli dana maaden, “Ija li nuigen. Age ija waliti cobimeig qa age dewenega silail fagadec eunu cal moqagan. Ija nui biligen euna age belecnu ihoc qee,” aden.

<sup>22</sup> Odocob Juda dana madein, “Uqa maden, ‘Ija nui biligen euna age belecnu ihoc qee,’ en. Uqa adi? Uqadodoc deweg qu cal migian imeifo eunu madena?” ein.

<sup>23</sup> Odocobil Jisas maaden, “Age mahanadec, ija ohisdec. Age maha qila bilina eunadec qa ija maha inadec qee.

<sup>24</sup> Age ija uqa eunu wawaga qee meleecebfi age dewenega silail fagadec eu odi cal moqagan. Eunu ija age dewenega silail fagadec eu odi cal moqagan ec maadiga,” aden.†

<sup>25</sup> Odocob age madoin, “Hina in?” doin. Odocobil Jisas jejenega hewi maaden, “Ija sanan mec-nadec maadem eu haun ceseli madigina.

<sup>26</sup> Ija agenu je mati bahic maadecnuca, agenu je gesiladecnuca nijia. Euqa ija sulten uqana je eu mele bahic. Ijaqa uqa mateceb dom eu dana cajaca mahana bilegina eu amagana maadigina,” aden.

<sup>27</sup> Juda dana age Jisas uqa Memige Anutnu maaden eunu wawaga qee fogo dol.

<sup>28</sup> Eunu Jisas haun maaden, “Age Dana Melah caqusecebil caculeceb age ija ijanu ec madigina

---

† **8:24:** Kisim Bek 3.14na Anut uqa Moses madon, odimei uqa uqanu odi maden, “Ija uqa,” en. Qila i Jisas uqa uqanu Anutwe maden. Euqa dana cajaca age uqana je eunu qee fogo adel.

eu wawaga camasac fogo dugian. Age ijadodoc cisdoc toodu ceteh qee odigina qa ija Memige Anut iwalten eu odi himec je madigina eunu ha wawaga fogo dugian.

<sup>29</sup> Ija sulten eu ijaca biluwuna. Uqa gale dona eu ija gaid odigina eunu uqa ija cuhanuc qee cultel,” aden.

<sup>30</sup> Jisas uqa je odi maadeceb dana mati uqanu wawaga meleen.

*Mele je eu dana cajaca besiadigian*

<sup>31</sup> Odocob Jisas uqa Juda dana age uqanu wawaga meleen eundec maaden, “Ija age je maadigina je eu toodu gaid biluqagaqa age mele ijana malogom biluqagan,

<sup>32</sup> age mele jenu wawaga fogo dugian, odocob mele je eu besiadigian,” aden.

<sup>33</sup> Odi maadeceb age madoin, “Ege Ebrahim si huldec. Ege osona begabeg meh qee bilolom. Hina eetanu magagana, ‘Age besiadec biluqagan’ agana?” doin.

<sup>34</sup> Odocobil Jisas jejenega hewi maaden, “Ija je mele maadigina, oso uqa silail mena eu uqa silailna begabeg meh cabi dana.

<sup>35</sup> Begabeg meh uqa gaid uqana benna jona qee biliaun qa benna mel uqa uqana jona gaid bilina.

<sup>36</sup> Eunu Anut Melah uqa age begabeg meh biluwainnu besiadecbfi age mele bahic besiadec biluqagan,” aden.

<sup>37</sup> “Ija age Ebrahimna si huldec ec dugina euqa ijana je wawaga qee fagdona eunu age ijanu madi qoqan egina.

38 Mei ihacteceb fem eunu maadigina. Ageha age memega iwaladeceb doin eu age odogina,” aden.‡

39 Odocob age jejeg hewi madoin, “Ebrahim uqa ege memige,” doin. Odocobil Jisas maaden, “Age mele bahic Ebrahimna mel bileigalumi age Ebrahim odon eu odiwe odoub.

40 Ija mele je eu Anut mateten dom eu maadem. Qilaqa age ijanu madi qocomun cal migian egina. Ebrahim uqa odi qee odol.

41 Age memega bahic odon eu ageha odogina,” aden. Odocob age madoin, “Ege sasail caja uqa melahul qee! Ege memige osol bilina eu uqa Anut himec,” doin.

42 Odocobil Jisas maaden, “Ija Anutnadec hom, ene biligina. Ija ijadodoc odocna qee holom qa uqa sulteceb hom. Eunu Anut uqa mele age memega bilialumi age ija naluni moub,” aden.

43 “Age eetanu ija je maadigina eunu wawaga qee fogo dona? Age je ija maadigina eu dah mecnu culegina eunu wawaga qee fogo dona.

44 Ageqa memega Setenna mel bilegina. Memega eu waug gale dona eundec age todocnu gale adena. Gug qoc saennadec uqa dana aqecnu tawena. Mele je madec eu uqa waugna qee tawel. Eunu uqa mele je qee madena. Uqa uhulec je madec dana, cunug age uhulegina eu agena memega. Eunu uqa uhulec je madena eu uqadodoc duman toodu madena.

---

‡ 8:38: Grik jaqec je hilah leihna age je fil oso jaqein eu odi: “Ageha ege Memige iwaladeceb doin eu age odogina,” aden.

<sup>45</sup> Ijaqa mele je maadigina eunu age ijana jenu wawaga qee meleena.

<sup>46</sup> Age eundec oso in ija silail mimigin meciten uqa ene hu madeia? Ija je mele maadigina, eetanu age wawaga qee meleena?

<sup>47</sup> Oso uqa Anutnadec eu uqa Anutna je dah mena. Ageqa Anutnadec qee eunu ijana je qee dah megina,” aden.

*Jisas uqa Ebrahim qee cali hoc ninijen ija bilem ec maaden*

<sup>48</sup> Odocob Juda age Jisas madoin, “Ege hina Sameriadec dana buga me qee oso hinaca bilina ec hoqona eu mele qeefo?” doin.

<sup>49</sup> Odocobil Jisas jejenega hewi maaden, “Buga me qee ijaca qee bilina. Ija Mei binan suligina, ageqa ija cewitegina.

<sup>50</sup> Ijadodocqa ija binani wasigiannu qee odigina. Oso ija binani wasigiannu odona eu uqa ija gesilitigian.

<sup>51</sup> Ija je mele maadigina, oso ijana je waugna tacena eu cal mec bahic qee feiaun,” aden.

<sup>52</sup> Odocob Juda madoin, “Ege qila buga me qee hinaca bilina ec mele doqona! Ebrahim wele cal men, je hahun madec dana ageha wele cal mein. Hinaqa madagana, ‘Oso ijana je waugna tacena eu cal mec qee feiaun,’ agana.

<sup>53</sup> Hina ege memige Ebrahim wooldoc biliginafa? Uqa cal men, je hahun madec dana ageha cal mein. Hina cel dana ec madagana?” doin.

<sup>54</sup> Odocobil Jisas jejenega hewi maaden, “Ija ijadodoc binani suliginafi ija binani gauc suligina.

Eu ija Mei, uqanu age uqa egena Anut egina, eu ija binani sulina.

<sup>55</sup> Euqa age uqanu qee doloin qa ija uqa dugina. Ija uqa qee dugina ec madoummiqa age uhulec dana bileginawe ijaha odi uhulec dana biloum. Euqa ija uqa dugina, uqana je hewi toodu odigina,” aden.

<sup>56</sup> “Age memega Ebrahim uqa ijana saen cali hocob figiannu ceelen. Uqa fimei celeboen,” aden.

<sup>57</sup> Odi maadeceb madoin, “Hina cabi gel 50 qee ihoc lel, hina Ebrahim femfo?” doin.

<sup>58</sup> Odocobil Jisas maaden, “Ija je mele maadigina, Ebrahim qee cali hoc ninijen ija bilem,” aden.

<sup>59</sup> Jisas uqa odi maadeceb age meen qeli qoqan imeig meen cedein qa Jisas uqadodoc jahunimei tempel culdimei nuen.

## 9

### *Jisas uqa dana ameg galuc mec me muden*

<sup>1</sup> Jisas uqa cocobi nunui bilei uqa dana oso uqa anag waugnadec ameg galuc men odi cocobi ben men bibilen fen.

<sup>2</sup> Uqana malogom Jisasca li sisildu madoin, “Meca, dana i uqa anag waugnadec ameg galuc mec cali hon eu in silail meceb odi odon? Uqa silail menfo, qee memegfo anagfo silail mesin eunu uqa ameg galuc mec cali hon?” doin.

<sup>3</sup> Odocobil Jisas maaden, “Dana eu anag waugnadec ameg galuc mec cali hon eu uqa silail mecebnu qee, memeg anagca alena silailnu ha

qee. Anutna cabi oc uqa dewegna camas mi-giannu eunu ameg galuc mec cali hon.

<sup>4</sup> Cahineg nijia eunu ege sulten eu uqana cabi ege odoc bahic odoqan. Witic migian, saen euna cabi ocnu oso qee nijiaun.

<sup>5</sup> Saen ija mahana bibili ija mahamaha fulacdoc biligina,” aden.

<sup>6</sup> Jisas odi maadime i uqa maha cin qumei sahal-icna olig ibuldumei u dana amegna cucusime i

<sup>7</sup> madon, “Hina Siloam wa cagocna limeg hina amen wasacudagale,” don. (Siloam uqana gug eu “Suldon.”) Odocob dana eu li ameg wasacudeceb ameg fogo docob ceseli hon.

<sup>8</sup> Odocob dana age dana eu muduban bilec ageca, wele uqa niniadi bibilen mecidoin euca madein, “Dana i uqa wele bibili sabnuca qaignuca ninigoloi eu qeefo?” ein.

<sup>9</sup> Leih madein, “Eu uqa,” ein qa leih madein, “Qee, eu uqa qee qa uqa fecnu eu uqa cinigwe,” ein. Odocob dana eu uqadodoc maaden, “Ija dana eu ijom,” aden.

<sup>10</sup> Odocob age sisildoin, “Amen adi fogo doia?” doin.

<sup>11</sup> Odocob uqa maaden, “Dana uqa ijan Jisas uqa olig mimei ija amina cucusime i maten, ‘Hina Siloam wa cagocna limeg hina amen wasacudagale,’ ten. Mateceb ija li ami wasacudecemin ami fogo docob qila me feciigina,” aden.

<sup>12</sup> Odocob age sisildoin, “Dana eu ana?” doin. Uqa maaden, “Ija qee dugina,” aden.

*Farisi age dana ameg galuc mec me muden eu fein*

13 Odocob age dana uqa wele ameg galuc mec bilen eu ehudi Farisi cemenega mudein.

14 Aria, Jisas olig mimei dana eu ameg me mudeceb fogo don eu Juda agena cuha deelna.

15 Ono Farisi ageha dana eu hina amen adi fogo doia ec sisildoin. Odocobil uqa maaden, “Uqa olig amina cucuseceb ija limig ami wasacudecemin qila me feciigina,” aden.

16 Odocob Farisi leih madein, “Dana eu uqa cuha deel qee mudina. Eunu uqa Anutnadec qee hol,” ein. Euqa leih age madein, “Dana silail mec adi kobolkobol eu odocnu ihoc?” ein. Odimeig age am qatani lecisdoin.

17 Odimeig age dana ameg galuc mec me muden eu haun sisildoin, “Uqa hina amen me mudeceb fogo doiannu hina uqanu eeta madagana, uqa in?” doin. Odocob uqa maaden, “Uqa je hahun madec dana oso,” aden.

18 Juda dana age dana eu uqa wele ameg galuc mec bilen, qila ameg me feciena ec eunu wawaga qee meleel, age feeecnu odi odoin. Eunu dana eu memeg anagca utaaalecebil hocobil

19 sisilali maalein, “Dana eu ale melemelafo, ale uqa anag waugnadec ameg galuc mec cali hu bilen ec madesina? Eu melefi adi qila feciena?” alein.

20 Odocobil memeg anagca maadesin, “Uqa ele melemile eu dowona. Uqa ameg galuc mec cali hon euha dowona.

21 Euqa uqa qila adi odocob feciena, in odudeceb ameg fogo duton eu ele qee dowona. Uqa sim qee, uqadodoc saadecnu ihoc. Age uqa sisildu feiga,” adedin.



<sup>22</sup> Juda age wele madi cagoin ec madein, “Oso Jisasnu uqa Anutna Kraiss ec madecebfi ege uqa cuha jonadec ititacdocomun tamanecna qee bil-iaun,” ein. Eunu uqa memeg anagca ale Juda dananu cucuiesinnu odi madesin.

<sup>23</sup> Eunu uqa memeg anagca maadesin, “Uqa sim qee, age uqa sisildu feiga,” adessin.

<sup>24</sup> Odocobil Juda dana age haun lecisdu dana uqa ameg galuc mec bilen eu utadocobil hocob madoin, “Ege dana eu uqa silail mec dana eu doqona. Hina Anut amenna je tutuc magecnu madagale!” doin.

<sup>25</sup> Odocobil uqa maaden, “Uqa silail mec danafo ija qee dugina. Euqa ija wele ami galuc mec bitem, qila ija me feciigina eu ija dugina,” aden.

<sup>26</sup> Age haun sisildu madoin, “Uqa adi odihen? Adi amen fogo duhen?” doin.

<sup>27</sup> Odocobil uqa maaden, “Ija age wele maadiga. Euqa age qee dah melein. Age eetanu haun magecem doqa tegina? Ageha uqana malogom ibuldoqaganfa?” aden.

<sup>28</sup> Odocob age cewudodoig madoin, “Hina uqana malogom, egeqa Mosesna malogom.

<sup>29</sup> Anut Mosesca je madesin eu egeha doqona, euqa dana eu uqa anadec hon eu ege qee doqona!” doin.

<sup>30</sup> Odocobil uqa jejenega hewi maaden, “Eu adi bahic! Age uqa anadec hon eu ege qee doqona egina euqa uqa ija ami fogo duten!

<sup>31</sup> Anut uqa silail dana agena je qee dah mena eu ege doqona. Euqa oso uqa Anut binan susuli uqa jejeg toodudu odona eu uqa Anut je madocob dah mena.

<sup>32</sup> Anut maha ifanen euna gug qumeig cisdudu hu qila calimeig dana oso anag waugnadec ameg galuc mec cali hon eu dana oso hu ameg fogo duton cocobon oso qee dogina.

<sup>33</sup> Dana eu Anutnadec qeemi uqa ceteh oso odocwe qee,” aden.

<sup>34</sup> Odi maadeceb age madoin, “Hina silail jahul-heceb anin basihen. Hina ege iwalgeganfo?” dumeig cuha jonadec ititadocobil nuen.

*Dana age wawaga qee meleel eu dana amaga galuc mec cinigwe*

<sup>35</sup> Juda age dana eu cuha jonadec ititacdoinnu Jisas dah mimei uqa dana eu wawali guluc-dumei sisildon, “Hina Dana Melahnu wawin meleenafu?” don.

<sup>36</sup> Odocob dana Jisas jejeg hewi madon, “O Tibud, ija uqanu wawi meleigiannu Dana Melah eu in?” don.

<sup>37</sup> Odocob Jisas madon, “Hina eu fem. Uqa je mahena eu uqa,” don.

<sup>38</sup> Odocob dana uqa Jisas madon, “O Tibud, ija wawi meleena!” don. Odimeu uqa Jisas amegna gob cehimeu uqanu cuha fen.

<sup>39</sup> Odocob Jisas je odi maden, “Ija dana amaga galuc mec eundec amaga fogo doc oqagannuca, dana age me fegina eu amaga cufa qugiannuca mahana nem. Eunu ija dana gesiladecnu mahana nem,” en.

<sup>40</sup> Farisi leih age Jisas je eu mamaden dah mimeig madoin, “Egeha amige galuc menfo?” doin.

<sup>41</sup> Odocob Jisas maaden, “Age amaga galuc mec biloubmi silail oso dewenega fagdoc qee tawoub.

Ageqa ege me foqona egina eunu agena silail dewenega fagdocob cobogina,” aden.

## 10

### *Jisas uqa sipsip cofadec me bahic*

<sup>1</sup> Jisas maaden, “Ija je mele maadigina, dana oso uqa sipsip agena jona jic cebecna qee lenaqa, filna leti lena, eu uqa heje dana, uqa dana agena ceteteh heje cedena.

<sup>2</sup> Dana uqa sipsip agena jona jic cebecna lena, eu uqa sipsip cofadec dana.

<sup>3</sup> Jic cebec cofdoc uqa dana i jic huditona. Sipsip age uqa jejeg dah megina. Uqa uqana sipsip ijanaga uutaadime i ehadime i aquniaadi calena.

<sup>4</sup> Uqa uqana sipsip cunug ehadi maha gumuna madime i uqa aquniaadi cobona. Odocob age uqa jejeg doginanu age uqa toodudu hogina.

<sup>5</sup> Sipsip age dana filna jejeg qee dogina. Eunu age dana fil qee toodogina, euqa age uqa cuculdi busalegina,” aden.

<sup>6</sup> Jisas uqa galolo je i odi maaden ageqa je eu silig qee doloin.

<sup>7</sup> Eunu Jisas haun maaden, “Ija je mele maadigina, ija sipsip agena jic cebec.

<sup>8</sup> Ija qee hoc ninijen cunug hoin eu age heje dana, age dana agena ceteteh heje cedegina. Euqa sipsip age jejenega qee dah melein.

<sup>9</sup> Ija jic cebec. Oso ijaca hu dunuhna lena eu Anut uqa cahahadugian. Odocob uqa dunuh leceb maha gumu cali hocob uqa eu odi lili huhui sab gulucdugian,” aden.

10 “Heje dana uqa heje ocnuca, aqecnuca, fadaladecnuca hona. Ijaqa sipsip age cebac bilec umeig agena cebac bilec ihoc lec eu gulucdoqagannu hom.

11 Ija sipsip cofadec me. Cofadec me uqa uqana cebac bilec uqana sipsipnu culina.

12 Cabi dana qaig ocnu cabi ona, sipsip age uqa toinan qee, eu uqa qa cus hohon fimeisipsip cuculadi busalena. Odocob qa cus sipsip hewadi bilisaadena.

13 Dana i uqa qaig ocnu cabi ona, uqa sipsipnu qee cisdonu eunu uqa busalena,” aden.

14-15 “Ija sipsip cofadec me. Memige Anut ijanu dona, ija Memige Anut ha dugina eu odiwe ija ijana cunug dugina, ijana age ijanu dogina. Odocob ija ijana cebac bilec ijana sipsipnu culigen.

16 Ijana sipsip filfilha bilegina age jo inadec qee. Eu ija ageha cedi ehadigen. Ageha ija jejeni dah moqagan. Hibna age tamanec osol cofadec osolca meceb biluqagan.

17 Ija ijana cebac bilec culimig haun ceseli ugen. Eunu gug inu Memige Anut ijanu nalug mena.

18 Ijana cebac bilec oso qee cawaltina, ijadodocqa eu culigina. Cebac bilec culecnuca, haun ceseli ocnuca eu ijadodoc ebenina nijia. Mei odoc eu odogan ec gatiti maten,” aden.

19 Jisas je odi maadecebnu Juda dana age haun togodudu am qatani lecisdoim.

20 Leih matica age madein, “Buga me qee uqaca bilina! Uqa gad qona! Eetanu uqa jejeg dah moqona?” ein.

21 Euqa leih madein, “Je dah moqona eu dana buga me qeeca bilina eundec uqa madenawe qee dah moqona. Dana buga me qeeca bilina eu uqa dana ameg galuc mec ameg fogo dutocnu ihocfo?” ein.

*Juda dana age Jisas cad mudein*

22 Saen leih gieceb age Jerusalem ono wele tempel eeldoin deel eunu cisdocnu cegulein. Eu duan saen nijen.

23 Jisas uqa tempel cegulec hamolna eu ijan Solomonna hamol euna cocobon

24 Juda dana age cegulimeig uqaca hu alildu tatawi madoin, “Hina ege hinanu dadani tawec aadeb cagasigegan? Hina Anutna Kraisi camasac magecem doqale,” doin.

25 Odocobil Jisas jejenega hewi maaden, “Ija eu wele maadem qa age wawaga qee meleel. Cabi ija Mei ijanna ugina eu ijana gug camasac mena.

26 Euqa age ijana sipsip sihul qeenu wawaga qee meleena.

27 Ijana sipsip ija jejeni dah megina, ija agenu dugina. Odocob age ija tootegina.

28 Ija age cebac bilec catanec eu adigina. Age qee fadalowain. Oso uqa age ebeninadec qee cawaltiaun.

29 Mei uqa sipsip eu iten eu ceteu cunug wooldoc ben. Oso uqa Memige Anut ebennadec cawaladecwe qee.

30 Memige Anut ijaca ele osol,” aden.

31 Odocob Juda dana age haun Jisas qoqan imeig meen cedi ahoin.

<sup>32</sup> Odi oodogin Jisas haun maaden, “Ija age amagana Memige Anutna me odoc mati bahic odom. Cel odoc eundec osonu age ijanu madi, meenna qoqan, egina?” aden.

<sup>33</sup> Odocob Juda age uqa jejeg hewi madoin, “Hina me odom eunu qee meenna qihuqaun qa hina Anut lelandogona! Hina dana oso himec qa hinadodoc hina Anut agana eunu meenna qiheqan!” doin.

<sup>34</sup> Odocobil Jisas maaden, “Agena loo jena jaqec oso tawen eu odi Anut maden:  
‘Age anut bilegina,’ en *(Buk Song 82.6)*  
eunu dogina.

<sup>35</sup> Anutna jaqec je madena eu mele gaid tawena eu doqona. Odocob Anut uqa dana uqana jaqec je aden eundecnu maden, ‘Age anut bilegina,’ en.

<sup>36</sup> Memige Anut uqa ija qagu mitimei sulteceb mahana toni nem. Eunu age adi madegina, ‘Ija madigina, “Ija Anut Melah,” iginanu Anut lelandugina,’ egina?” aden.

<sup>37</sup> “Ija Meina cabi oc qee odiginafi ijanu wawaga cain meleeiaun.

<sup>38</sup> Euqa ija cabi oc eu odiginafi, age ijanu wawaga qee meleenaga, age ijana cabi oc eunu wawaga meleeiale. Eunu Memige Anut ija dunuhna bilina, ija Memige Anut dunuhna biligina ec du cuhadoigale,” aden.

<sup>39</sup> Odocob age haun ceseli hewecnu odoin qa uqa ebenegana abulisdobibil nuen.

<sup>40</sup> Odimej Jisas uqa ceseli Jodan wa letimej hatu wele Jon dana cajaca wa joaden euna limej ono saen nag meca bilen.

<sup>41</sup> Dana caja matica uqa mecidoqagannu hoin. Age togodudu madein, “Jon uqa kobolkobol oso qee odol qa ceteħ cunug uqa dana inu maden eu mele calen,” ein.

<sup>42</sup> Odocob dana cajaca mati ono uqanu wawaga meleen.

## 11

### *Lasaras cal men*

<sup>1</sup> Aria, dana oso, ijan Lasaras, uqa Betani jobon ono bilina uqa hag nijen. Betani jobon eu Maria uqa waliag Mataca ono bilesin. (

<sup>2</sup> Caja oso uqa Tibud jaihna mool dedemanca basecdu joudimei uqa gosicna cacuton eu Maria. Uqa cebinag Lasaras hag nijen.)

<sup>3</sup> Hag ninijen cebinagul lecis ale Jisasca je suldu madosin, “O Tibud, dana hina uqanu nalug magana eu uqa hag nijia,” dosin.

<sup>4</sup> Odocob Jisas je eu dah mimei maden, “Hag eu Lasaras cal miġiannu qee qona. Eu age Anut uqana kobolkobol fecnu hag qona. Eunu ceteħ ina Anut Melah uqana kobolkobol camasac miġian,” en.

<sup>5</sup> Jisas uqa Matanuca Marianuca ale cebinamala Lasarasnuca nalunuga men.

<sup>6</sup> Eunu uqa Lasaras hag nijia je eu dumei uqa tu lecis haun ono bilen.

<sup>7</sup> Tu lecis eu hedocob uqa malogom maaden, “Ege haun ceseli Judia hatuna beleqan,” aden.

<sup>8</sup> Odocob malogom age madoin, “Meca, saen qee giel hina ono cocobogon Judia dana age meenna qihecnu odoin. Hina haun ceseli Judia hatuna beleqan agana eu adi?” doin.

<sup>9</sup> Odocobil Jisas maaden, “Cahineg osol eu aua 12-pela qeefo? Oso cahineg cobonafi uqa mahana fulacdoc fenanu uqa deweg qee toni qona.

<sup>10</sup> Euqa oso uqa witic cobonafi fulacdoc uqaca qee bilinanu uqa deweg toni qona,” aden.

<sup>11</sup> Uqa odi maadime i haun maaden, “Egena danah Lasaras uqa wele us nijian, euqa ija nuimig tulidocomin cajigian,” aden.

<sup>12</sup> Odocob uqana malogom madoin, “Tibud, uqa us nijecebfi hag medugian,” doin.

<sup>13</sup> Jisas uqa Lasaras cal meianu maadena, malogom ageqa uqa us nijia himec eunu madena ec cisdoin.

<sup>14</sup> Odocobil Jisas camasac maaden, “Lasaras uqa cal meian.

<sup>15</sup> Ija agenu cisdudu madigina, ‘Ija ono qee bilelem eunu ceeligina,’ igina. Age wawaga meleec duuigiannu eunu madigina. Gec, ege qila uqaca beleqan,” aden.

<sup>16</sup> Tomas (uqa Mel Gahca egina) uqa malogom cotugul maaden, “Gec, ege cunug Iwalgec gami belecnu eunu ege cunug uqaca cal mecnu!” aden.

### *Ceseli cajecnu gugca cebac bilecnu gugca eu Jisas*

<sup>17</sup> Jisas uqa ono calime i Lasaras uqa deel 4-pela heelna nijen je eu don.

<sup>18</sup> Betani jobondec Jerusalem lecnu eu kilomita cijed odi nijen.

<sup>19</sup> Juda dana cajaca mati age Lasaras cal mennu cebinagul Mata Mariaca wahohogalecnu hoin.



20 Mata uqa Jisas hona ec madecebil dumei uqaca jicna gulucdadanewan imei nuen qa Maria jo hamol bilen.

21 Mata uqa Jisasca limei madon, “Tibud, hina ene biloummiqa ija cebinami qee cal moub!

22 Euqa ija qila ha dugina, hina Anut ceteh osonu je sisildogaqa eu uqa ihigian,” don.

23 Jisas uqa madon, “Hina cebinam uqa ceseli cajigian,” don.

24 Odocob Mata uqa Jisas jejeg hewi madon, “Uqa deel cit qocna cajec benna ceseli cajigian eu ija mele dugina,” don.

25 Odocob Jisas madon, “Ceseli cajecnu gugca cebac bilecnu gugca eu ija! Oso ijanu waug meleena eu uqa cal migiaqa uqa cebac biligian.

26 Oso uqa cebac bibili ijanu waug meleena eu qee cal meiaun. Hina eunu wawin meleenafo?” don.

27 Odocob Mata madon, “Ese Tibud! Hina Anutna Krais, hina Anut Melah uqa mahana nem eu ija wawi meleena,” don.

### *Jisas uqa Lasarasnu walol docob qajen*

28 Mata je eu Jisas madumei uqa nuimei waliag Maria jahuni utai madon, “Iwalgec hoia. Uqa hina cemeni hoga hena,” don.

29 Odocob Maria je eu dumei uqa mahuc caji Jisasca len. (

30 Jisas jobon qee calel qa uqa Mata uqaca limei gulucdon euna bilen.)

31 Juda dana cajaca age Maria wahohogdocnu uqaca jona bilein eundec age Maria mahuc caji

nunuen fimeig age uqa qalqalna qajigia nuina imeig age uqa toodu belein.

<sup>32</sup> Odocob Maria uqa Jisas tatawen euna li Jisas fimeig uqa jaihna tonimeig madon, “Tibud, hina ene biloummiqa ija cebinami qee cal moub!” don.

<sup>33</sup> Odocob Jisas uqa Maria qaqajen Juda dana cajaca age uqaca hoin eu ageha qaqajegin feciadimeig eu waug qocob walol don.

<sup>34</sup> Odimeig uqa sisiladi maaden, “Age ana heelna mudein?” aden. Odocob madoin, “Tibud, hu fagale,” doin.

<sup>35</sup> Odocobil Jisas uqa qajen.

<sup>36</sup> Odocob Juda dana cajaca age eu fimeig madein, “Feiga, uqa Lasaras culaug ona!” ein.

<sup>37</sup> Leihqa madein, “Uqa dana ameg galuc mec coboloi eu ameg fogo duton, uqa Lasaras cal meiaunnu odi qee cesuldolfo?” ein.

### *Jisas uqa Lasaras cali hoga ec madocob ceseli cajen*

<sup>38</sup> Odi mamadegin agena je Jisas haun waug qocob walol don. Odimeig uqa heel Lasaras mudein euna len. Lasaras mudein eu meen hatin. Meen ben oso hatin heel cebecna cufa goin.

<sup>39</sup> Odimeig Jisas maaden, “Meen eu besi oiga!” aden. Odocob Mata cal mec dana cebinag uqa Jisas madon, “Tibud, ege heel cisom eu qila deel 4-pela ihoc lena! Uqa wele tul wasena,” don.

<sup>40</sup> Odocob Jisas madon, “Ija hina, hina wawin meleecebfi hina Anutna kobolkobol fegan ec qee mahelemfo?” don.

<sup>41</sup> Eunu Jisas odi madocob age meen besi oin. Odocob Jisas uqa tatii Memeg madon, “Mei, ija je mahecemin dah mitem eunu ija hetaga higina.

<sup>42</sup> Ija hina jejeni gaid dah mitigina eu dugina qa dana cajaca alilti tawegina agenu age hina sultem eunu wawaga meleigiannu je i mahigina,” don.

<sup>43</sup> Jisas odi madime i uqa utai Lasaras madon, “Lasaras cali hoga!” don.

<sup>44</sup> Odocob dana cal men eu jaih ebenca lotoc jelecca uqa ola lotoc jahuldocca uqa cali hon. Odocob Jisas maaden, “Lotoc cufaldimeig culdecebil nuiale,” aden.

*Juda iloilo agena cegulec benna ege Jisas qocomun cal migian ec madein*

*(Matju 26.1-5; Mak 14.1-2; Luk 22.1-2)*

<sup>45</sup> Eunu Juda dana cajaca mati age Mariaca hoin eundec age Jisas odon eu fimeig Jisasnu wawaga meleen.

<sup>46</sup> Leihqa age Farisi ageca belimeig Jisas odon eu cunug saadein.

<sup>47</sup> Odocobil Farisi age je eu docobil ihanec dana benbenca, Farisi ageca age cegulecnu utaadein. Cegulimeig age togodudu madein, “Dana eu kobolkobol odoc mati bahic odona! Ege eeta odeqan?”

<sup>48</sup> Ege uqa gaid eu odocnu qee cahacdocomunfi dana cajaca cunug uqanu wawaga meleigian. Odocob Rom dana age hu egena tempel wagalimeig egena dana cajaca cunug fadaloqagan!” ein.

49 Age gemodec osoqa, ijan Kaiafas, uqa cabi gel euna ihanec dana agena ilo bilen, eu uqa maaden, “Age ceteḥ calena eu qee dogina!

50 Dana osol uqa dana cajaca cunug fadalowainnu uqa age hehuladi cal migian eu cois eunu qee fogo adena!” aden.

51 Je eu uqadodoc cisdocna qee madel qa uqa cabi gel euna ihanec dana agena ilo bilen eunu uqa Jisasnu je hahun maden, “Uqa dana cajaca hehuladi cal migian,” en.

52 Uqa Juda dana cajaca dih hehuladi qee cal meiaunqa Anutna talacul age mahamaha bilisadoc bilegina eu tamanadigiannu euha maden.

53 Juda dana agena benben age eunu deel euna Jisas qocnu jic wawali togodoin.

54 Eunu Jisas uqa Juda dana amagana camasac qee coboloi qa uqa malogom gami hatu wadauna\* isec euna belimeig jobon Efraim ono li nag meca bilein.

55 Juda agena Pasowa Sab Jec Ben Deel cali hugia oodon dana cajaca mati age jobonnanadec dewenega soidocnu kobol odocnu Pasowa Deel Ben qee cali hoc Jerusalem ono ti bilein.

56-57 Ihanec dana benben Farisica age dana wele je cagu maadein, “Oso uqana bilec cudug fena eu uqa hu mageceb ege li heweḡan,” adein. Eunu age ono Jisas wawali tempelna maha gumu tatawi togodudu madein, “Age eeta cisdogina? Uqa sab jec benna qee hoiaunfo?” ein.

---

\* **11:54:** Age je Matju 3.1na nijia eu feiga.

## 12

*Maria uqa mool dedemanca Jisas jaihna basecdu qon*

*(Matju 26.6-13; Mak 14.3-9)*

<sup>1</sup> Deel 6-pela hedocob Pasowa Sab Jec Ben Deel caligiannu ninijen Jisas uqa Betani jobon nuen. Lasaras Jisas uqa cal mecnadec tulidocob cajen eu uqa jobon euna bilen.

<sup>2</sup> Ono age uqana sab saciadutoin. Mata uqa sab qocnu cesulaaden Lasaras uqa agenadec oso cabalna Jisas gami bilein.

<sup>3</sup> Odocob Maria uqa mool dedeman meca uqana lita naha cunug uqana qaig eu ohis bahic umei Jisas jaihna basecdu jouden. Odimej jaih eu uqa gosicna cacon. Mool uqana dedeman me bahic eu wasimej jo euna ihoc len.

<sup>4</sup> Euqa Jisasna malogom oso, Judas Iskariot, uqa hibna Jisas uqana cad ebenegana migian eu maden,

<sup>5</sup> “Age eetanu mool dedeman meca eu 300 kinana suldumeig qaig eu umeig sawen dana qee adelein?” en.

<sup>6</sup> Uqa odi madenqa uqa sawen dananu qee cisdumei madel. Euqa uqa heje dana, uqa cudaugna age qaig tacoloig eu gahidumei uqa eunadec uqadodocnu cesuldudu coboloi eunu uqa odi maden.

<sup>7</sup> Odocob Jisas madon, “Caja eu culdoga! Ija cal mecemin heel cisitoqagannu deel euna uqa odoc eu cois heheweb li caligiannu culdoga!

<sup>8</sup> Age sawen dana gaid age gami bileginanu qa ija gaid age gami qee biluqaun,” don.

*Farisi age Lasaras qocnu madein*

<sup>9</sup> Juda dana cajaca mati bahic age Jisas Betani jobon ono bilina mamadegin dah mimeig age ono hoin. Age Jisas feqan ec himec qee holoinqa age Lasaras, Jisas uqa eu cal meceb tulidocob cajan, euha feqan imeig hoin.

<sup>10-11</sup> Juda dana mati age Lasarasnu cisdumeig ihanec dana benben cuculadi Jisasnu wawaga meleceeb uqa toodoin. Eunu ihanec dana benben age Lasarasha qocomun cal migian ec madein.

*Jisas uqa king cinigwe Jerusalem dunuh len*

<sup>12</sup> Uqadec Juda dana cajaca mati bahic age Pasowa sab jecna hoin eu age Jisas Jerusalem hohon dumeig

<sup>13</sup> age hinahin cedimeig uqa gulucdoqaga bili belimeig utai madein:

“Hosana!\* Tibud binan suluqale!” ein.

“Oso uqa Tibud ijanna hona Tibud eeldoiale!” ein. *(Buk Song 118.25-26)*

“Tibud Isrel agena king eeldoiale!” ein.

<sup>14</sup> Jisas uqa cesel haun oso umei lalan bilen. Eu Anutna jaqec jena taweia odi toodon. Jaqec je eu odi maden:

<sup>15</sup> “Dana cajaca age Saion taunna bilegina eu cain cucuiuwain!

Feiga, agena king ageca hona!

Uqa cesel uqana nag goman guhadocob hona!” en. *(Sekaraia 9.9)*

<sup>16</sup> Saen euna uqana malogom age eunu wawaga qee fogo dol qa hibna Anut uqa Jisas tulidocob

---

\* **12:13:** Hibru jena uqana gug bahic eu “Anut cahahagale!” euqa saen euna eu Anut binan sulecnu je oso.

cajimei uqa Anut cemenug kobolkobol ocnu teceb age Anutna jaqec jena uqanu je eu maden, age uqanu odoin euha maden eunu cisdoim.

<sup>17</sup> Dana cajaca age Jisasca tatawegin uqa Lasaras utadocob cal mecnadec tulidocob meen heel dunuhnadec cajen eu age uqana odoc qasali maadein.

<sup>18</sup> Dana cajaca age uqa kobolkobol eu odonnu dah mein gug eunu age belimeig gulucdoim.

<sup>19</sup> Odocobil Farisi agedodoc togodudu madein, “Feiga, cetehe ege odeqa eu ihoc qee leiaun! Dana cajaca cunug qila uqa toodoqagannu wele beleiga!” ein.

*Grik dana leih age Jisas walein*

<sup>20</sup> Dana age Pasowa Sab Jec Ben Deelna Anutnu cuha foqagannu hoin eu gemona Grik dana leih bilein.

<sup>21</sup> Age Filip, uqa Betsaida jobon Galili hatunadec, eu cemenug limeig ninidudu madoim, “O Ben, ege Jisas fecnu madoqona,” doim.

<sup>22</sup> Odocobil Filip uqa li Andru madon. Odocobil Filip Andruca ale li Jisas madosin.

<sup>23</sup> Odocobil Jisas maalen, “Dana Melah uqa Anut cemenug kobolkobol ocnu tigiannu saen cali hoia.

<sup>24</sup> Ija je mele maadigina, wit aig mahana qee tonifei eu gauc bilina qa wit aig mahana tonime cal mifei eu wasime aig mati hanona.

<sup>25</sup> Oso uqadodocnu cebac bilec nalug mena eu uqa uqana cebac bilec eu culina. Oso maha ina uqana cebac bilec sagagdona eu uqa uqana cebac bilec eu cebac bilec catanec eu ugiannu gaidgaid hewena.

<sup>26</sup> Oso uqa ijana cabi hewecnu gale dona eu uqa ija gad tooteiale. Odocob ija biligenna ijana cabi dana uqaha ijaca ono bilewan. Oso uqa ijana cabi ona eu Memige Anut uqa uqana binanca mudigian,” alen.

*Jisas uqana cal mecnu je maden*

<sup>27</sup> Jisas je haun maalen, “Qila ija wawi culumenca gaid cisdugina. Ija cel je madigen? Ija odi madigenfa, ‘Mei, saen ina cahahataga,’ igenfa? Qee! Ija gug inu saen ina hom.

<sup>28</sup> O Mei, hina ijain sulecem ohis teia!” alen. Odi maaleceb sao jobonnadec jejeg oso maden, “Ija ijani wele ohis sulem, ija haun suligen,” en.

<sup>29</sup> Dana cajaca ono tawein eu jejeg dah mein. Leih age madein, “Eu udududoia,” ein. Euqa leih madein, “Anutna ensel oso uqa je madoia!” ein.

<sup>30</sup> Euqa Jisas maaden, “Jejeg i madeceb dah meiga eu ija cesultigiannu qee calel qa eu age cesuladigiannu caleia.

<sup>31</sup> Anut uqa dana cajaca mahana bilegina eu gesiladigiannu saen eu qila hoia. Anut uqa qila dana ben uqa mahamaha cunug cofdona eu ititadocob nuigian.

<sup>32</sup> Saen ija mahanadec sulitecebil ohis titi bilig dana cajaca cunug age diiadecemin ijaca hoqagan,” aden.† (

<sup>33</sup> Uqa adi cal migiannu camasac mecnu odi maden.)

---

† **12:32:** Jisas uqa age na babalecna tuitu qumeig caqusuqagan eunu maden. Jic euna Anut uqa suldocob uqa sao jobon timei ohis bahic biligian. (Age Filipai 2.9-11 feiga.



<sup>34</sup> Dana caja amca madoin, “Egena loo je eu Anutna Kraiss uqa cebac bileceb catanigian ec maden. Hina adinu age Dana Melah suldocobil ohis tigan ec madaga? Dana Melah eu in?” doin.

<sup>35</sup> Odocobil Jisas jejenega hewi maaden, “Fuladoc uqa ageca nag odi biligian. Tu ageca hu jahuladeiaunnu age fuladocca bibilebil jicna coboiga. Oso uqa tuna cobona eu ana nuina ec qee dona.

<sup>36</sup> Age fuladocca bibilebil age fuladocna dana cajaca ibuldoqagannu fuladoc eunu wawaga meleeiale,” aden.

*Juda dana cajaca mati bahic age Jisasnu wawaga qee meleel*

Jisas odi madi hedumei nui uqadodoc jahunen.

<sup>37</sup> Uqa amagana kobolkobol mati odonqa age uqanu wawaga qee meleel.

<sup>38</sup> Eunu je hahun madec dana Aisaia maden eu ihoc len. Aisaia odi maden:

“O Tibud, in uqa ege je madom eu waug meleen? Tibud uqa uqana gagadic odoc eu innu camasac men?” en. *(Aisaia 53.1)*

<sup>39</sup> Eunu age wawaga melecwe qee. Ge, Aisaia uqa je oso ha maden:

<sup>40</sup> “Anut odadeceb age amaga galuc men.

Anut odadeceb age wawaga tool ibuldon.

Eunu age amaga meciecwe qee, age wawaga fogo docwe qee.

Anut maden, ‘Eunu age ijanu qee falidocobilfi ija age qee me madigaun,’ en,” je eu odi maden. *(Aisaia 6.10)*

<sup>41</sup> Aisaia uqa Jisas uqana kobolkobol ugian eu fen eunu uqanu je eu maden.

<sup>42-43</sup> Age odoingqa Juda dana iloilo mati age Jisasnu wawaga meleen. Euqa age Anut agenu me adena eu qee gale adel, age dana age agenu me adegina eu gale aden. Eunu age Farisi dana eu agenu cucuieinnu cuha jonadec ititacadowainnu age uqanu camasac qee madelein.

*Jisasna je dana cajaca cunug gesiladen*

<sup>44</sup> Jisas co suli u maaden, “Oso ijanu waug meleena eu uqa ijanu dih qee meleena qa uqa sulten eunu ha waug meleena.

<sup>45</sup> Odocob oso ija mecitena eu uqa sulten euha mecidona.

<sup>46</sup> In oso uqa ijanu waug melegian eu uqa tuna qee biliaunnu ija mahana fulacdocwe nem.

<sup>47</sup> Ija dana mahana bilegina eu gesiladecnu qee nelem qa dana mahana bilegina eu cahahaadigennu nem. Eunu oso ijana je dah mimei qee waugna tacecebf ija uqa qee gesildugaun.

<sup>48-50</sup> Ija ijadodoc ijanu qee madelem qa Memige Anut uqa sulten eu uqa ija cel je madigennu gatiti maten. Memige Anutna je eu, dana age eunu wawaga meleena eu uqa cebac bilec catanec adena eu ija dugina. Je ija madigina eu Memige ija madigennu gatiti maten eu odi madigina. Eunu oso ija hibemtimei ijana je qee hewi daugdona eu oso uqa gesildugiannu nijia. Je ija madem eu cit qoc deelna uqa gesildugian,” aden.

## 13

*Jisas uqana malogom jaimaga cusiaden*

<sup>1</sup> Pasowa Sab Jec Ben Deel qee calec nini-jen Jisas uqa maha i culimei Memige Anutca nuigiannu saen eu wele hoia ec don. Uqa uqana, mahana gaid biloloig eu age gaid nalunuga moloi. Uqa nalunuga memen li uqana cal mec calen.

<sup>2</sup> Jisas uqana malogomca age sab jecna bilein. Seten uqa uqana cisdoc Judas Iskariot, Saimon melah, wele Jisas uqana cad ebenegana mecnu waugna men.

<sup>3</sup> Jisas uqa Memige Anut uqa cete h cunug uqa ebenna men, uqa Anut suldocob nen, uqa haun ceseli Anutca ti caligian eu cunug don.

<sup>4</sup> Eunu age sab joqaga bibilegin Jisas uqa cajime i uqana lotoc me eu hulimei cabi lotoc u wailohna taqen.

<sup>5</sup> Odimei uqa wa bohna o danimei malogom jaimaga wasacudiadime i cabi lotoc taqen euna cacuaden.

<sup>6</sup> Uqa odi oodadi Saimon Pitaca hon. Euqa Pita madon, “Tibud, hina ija jaimi wasacudecnu madaganaf o?” don.

<sup>7</sup> Odocob Jisas jejeg hewi madon, “Ija odigina eunu hina qila qee fogo henaqa, hina hibna fogo higian,” don.

<sup>8</sup> Odocob Pita madon, “Hina jaimi qee bahic wasacuditagaun!” don. Odocob Jisas jejeg hewi madon, “Ija hina qee wasacudihigeqa hina ijaca qee biluwaun,” don.

<sup>9</sup> Odocob Saimon Pita madon, “Tibud, ija jaimi himec qee wasacuditagaun qa ija ebeniha ilomiha wasacuditagale!” don.

<sup>10</sup> Odocob Jisas uqa Pita jejeg hewi madon, “Oso deweg wa jon eu deweg soidoc nijia, eu jaih

himec wasacudigian. Ageha dewenega soidoc bilegina, euqa cunug qee,” don.

<sup>11</sup> Ge, uqa dana uqa uqana cad ebenegana mecnu mamadi bilen eu camasac don. Eunu uqa maden, “Age cunug dewenega soidoc qee bilegina,” en.

<sup>12</sup> Jisas uqa malogom jaimaga wasacudi hedumei uqa uqana cabi lotoc hulimei lotoc me haun tacimei cabalna uqana bilecna li bibili maaden, “Ija qila odadiga eunu wawaga fogo doiafo?

<sup>13</sup> Ija agena Iwaladec Tibudca biligina. Eunu age ijanu madi, Iwalgec Tibudca tegina eu age tutuc madegina.

<sup>14</sup> Ija, agena Tibud Iwaladecca, age jaimaga wasacudiadiga eunu ageha jaimaga wasacudito-cobtocobi bileigale.

<sup>15</sup> Ge, ija qila kobol odocnu gug madiga eunu age kobol eu toodu odoigale.

<sup>16</sup> Ija je mele maadigina, cabi dana oso uqana memeg qee falic wooldu ben bilina. Dana oso uqa suldon euha uqana suldoc eu qee falic wooldu ben bilina.

<sup>17</sup> Qila age eunu dahiniga fogo dona. Eunu age eu toodu ha odoqagaqa age eeladec biluqagan!” aden.

<sup>18</sup> “Ija age cunugnu qee madigina. Ija dana ija nesili cedadem eundecnu dugina. Euqa Anutna jaqec je oso tawena eu ihoc ligiannu ceteh oso caligian. Je eu odi madena:

‘Oso uqa ijana sab jena eu uqa lahactecnu jaih sulina,’ ena. *(Buk Song 41.9)*

19 Ija eu qila eu qee calec ninijen odigiannu maadigina. Eunu isi caleceb age ija uqa eu mele bahicnu wawaga meleigian.\*

20 Ija je mele maadigina, oso uqa ija suladigina eundec oso ehudi bilec cudun utina eu ija ehiti bilec cudun itina. Oso uqa ija ehiti bilec cudun itina eu uqa ija sulten eu ehudi bilec cudun utina,” aden.

*Jisas uqana malogom oso uqa uqana cad ebene-gana mudigian ec maden*  
(Matju 26.20-25; Mak 14.17-21; Luk 22.21-23)

21 Jisas odi madimei hedocob uqa waug culumen docob uqa camasac maaden, “Ija je mele maadigina, age oso uqa ijana cad ebenegana mitigian,” aden.

22 Odocob malogom age filiciti mecidocobdocobein. Uqa innu madena imeig dadanein.

23 Malogom oso Jisas uqa culaug ona eu Jisasca duculdot bilesin.

24 Odocob Saimon Pita uqa malogom eu iho-hdumei madon, “Uqa innu madena ec sisildoga,” don.

25 Eunu malogom eu Jisasca duculdot bilesin eu qaalimei Jisas sisildu madon, “Tibud, hina innu madaga?” don.

26 Odocob Jisas jejeg hewi madon, “Ija sab oso wehucna tanumig utigen eu,” don. Odimei uqa sab oso wehucna tanumei Judas, Saimon Iskariot melah, uten.

---

\* **13:19:** Age je Jon 8.24na nijia eu feiga.

<sup>27</sup> Judas sab eu u jeceb Seten uqa waugna len. Odocob Jisas madon, “Hina odigen agana eu mahuc odoga!” don.

<sup>28</sup> Cabalna bilein eu age cunug Jisas eeta odocnu madona eu qee doloin.

<sup>29</sup> Leih age Judas cudaug qaigca hewen eunu Jisas uqa Judas madon, “Sab jec bennu sab fa-jaga,” donfo, qee “Hina qaig leih sawen dana adaga,” don ec cisdoin.

<sup>30</sup> Odocob Judas sab fan eu u jimei mahuc cali li nuen. Eu tu ninijen nuen.

### *Jisas uqa uqana malogom loo je haun aden*

<sup>31</sup> Judas nueceb Jisas uqa malogom maaden, “Qila Dana Melah uqana kobolkobol ona. Qila Anut uqa Dana Melah odocna kobolkobol ona.

<sup>32</sup> Anut uqa Dana Melah odocna kobolkobol onafi Anut uqadodoc Dana Melah kobolkobol utigian. Mele, uqa eu mahuc Dana Melah kobolkobol utigian.

<sup>33</sup> O melamiel, ija saen gohic bahic ageca bile-qan. Eu hedocob age ija walituqagan qa, ija wele Juda dana maadem, eu ija qila maadigina, ‘Ija nuigina euna age lecwe qee,’ adigina.

<sup>34</sup> Ija qila age loo je haun adigina, age nalug mudecebmudecebi coboigale. Ija age nalunuga mem eu odi ageha nalug mudecebmudecebi bileigale.

<sup>35</sup> Age odi nalug mudecebmudecebi biluqagaqa dana cunug age ijana malogom bilegina eu camasac doqagan,” aden.

*Pita uqa Jisasnu qee sasac qugian eunu Jisas uqa madon*

*(Matju 26.31-35; Mak 14.27-31; Luk 22.31-34)*

<sup>36</sup> Odocob Saimon Pita uqa Jisas sisildon, “Tibud, hina ana nuuguna?” don. Odocob Jisas madon, “Ija qila nuigina euna hina tootecnu qee nijel qa hibna tootegan,” don.

<sup>37</sup> Odocob Pita madon, “Tibud, eetanu ija qila toohi cobocnu qee nijel? Ija hina hehulhi cal migen,” don.

<sup>38</sup> Odocob Jisas jejeg hewi madon, “Hina ija hina hehulhi cal migen tagana eu mele bahicfo? Ija je mele mahigina, mala manahal qee qoc ninijeb hina ijana biligina eu qee sasac qu cijed-dogan!” don.

## 14

*Jisas uqa Memigeca nuecnu jic*

<sup>1</sup> Jisas uqa maaden, “Age wawaga cain qeleleiaun, cain cucuiuwain. Age Anutnu wawaga meleeiale, ijanu ha wawaga meleeiale.

<sup>2</sup> Meina jona bilec hamol mati nijadeiga. Eu odi qee nijoubmi ija qee maadom, ‘Ija ono agena bilec cudun eeldocnu nuigen,’ adom.

<sup>3</sup> Ija nui agena bilec cudun eeldu hedumig ija ceseli humig ija biligina euna age ijaca bileqannu age cedadi ehadigen.

<sup>4</sup> Ija nuigina eu age jic eu fegina,” aden.

<sup>5</sup> Odocob Tomas uqa madon, “Tibud, hina ana nuuguna, eu ege qee doqona. Eunu jic eu adi feqan?” don.

<sup>6</sup> Odocob Jisas uqa jejeg hewi madon, “Jic eu ija, mele gug eu ija, cebac bilec silig eu ija. Oso Memige Anutca qee leiaun, ija dih odocomin Memige Anutca loqagan.

<sup>7</sup> Age ijanu wawaga fogo doialumi Meinu ha wawaga fogo doub. Age qila uqanu wawaga fogo dona, age Mei ha fein,” aden.

<sup>8</sup> Odocob Filip madon, “Tibud, Memige Anut ihacgecem feqan eu ihoc,” don.

<sup>9</sup> Odocob Jisas madon, “Filip, ija saensaen ageca biluqunaqa hina ijanu wawin qee fogo dolfo? Hina adi Memige Anut ihacgaga foqa tagana? Oso ija meciteia, eu uqa Memige Anut mecidoia.

<sup>10</sup> Ija Memige Anut dunuhna biligina, Memige Anut ija dunuhna bilina eunu wawin qee meleelfo? Je ija maadigina eu ijana je qee. Memige Anut uqa ija dunuhna bilina eu uqadodoc uqana kobolkobol odona,” don.

<sup>11</sup> “Ija Memige Anut dunuhna biligina, Memige Anut ija dunuhna bilina ec maadigina eunu ijanu wawaga meleeiale. Age ijana jenu qee wawaga meleecebfi age ija kobolkobol odigina eunu himec ijanu wawaga meleeiale,” don.

<sup>12</sup> “Ija je mele maadigina, oso ijanu waug meleena eu ija kobolkobol odigina euha odigian. Ija Memige Anutca tigennu uqa ija wooltec kobolkobol odigian.

<sup>13</sup> Memige Anut binan eu Melah odocna ben mi-giannu age ija ijanina ceteh osonu inondoqagaga eu ija odigen.

<sup>14</sup> Age ija ijanina ceteh osonu inontecbilfi eu ija odigen,” aden.



*Jisas uqa Kis Gun suldocob nigianu sahunaden*

<sup>15</sup> Jisas je haun maaden, “Age ija naluni moqagaqa age ijana loo je toodu odoqagan.

<sup>16</sup> Odocobil ija Memige Anut inondocomin uqa Tutuanaga Oc oso sulduadigian. Eu uqa ageca bileceb catanigian.

<sup>17</sup> Eu mele jenu Kis. Mahanadec age uqa qee fifi dudu egina. Eunu age uqa ocnu qee nijel. Euqa uqa ageca bilina, uqa age dunuhna biligian. Eunu age uqanu dogina,” aden.

<sup>18</sup> “Ija age mel bega cinigwe qee tegeladi nuigaun. Ija ageca ceseli hugen.

<sup>19</sup> Saen gohic odi gieceb mahanadec dana age ija haun qee mecituwain. Ageqa mecituqagan. Ija cebac biliginanu ageha cebac biluqagan.

<sup>20</sup> Saen euna ija Mei dunuhna biligina, age ija dunuhna bilegina, ija age dunuhna bilegina eunu age wawaga fogo dugian.

<sup>21</sup> Oso ijana loo je umei toodu odona eu uqa ija naluni mena. Mei uqa dana eu ija naluni mena eunu nalug migian. Odocob ija uqanu nalug mimig ijana gugnu camasac mudigen,” aden.

<sup>22</sup> Odocob Judas, eu Judas Iskariot qee, uqa Jisas sisildu madon, “Tibud, eetanu hina hinana gugnu ege amigena camasac megan qa dana mahanadec amagana qee camasac migaun agana?” don.

<sup>23</sup> Odocob Jisas jejeg hewi madon, “Oso uqa ija naluni mena eu ijana je toodu odigian. Odocob Mei uqa dana eunu nalug migian. Odocob Meica ijaca ele limeu dana eu elena jo bilec uqa dunuh bilewan.

<sup>24</sup> Oso ija naluni qee mena eu uqa ijana loo je ha qee toodu odona. Je i maaadigin dah megina

eu ijana qee qa eu Memige Anut ija sulten uqana je,” don.

<sup>25</sup> Odimei maaden, “Je eu ija ageca bibili maadem.

<sup>26</sup> Agena Tutuanaga Oc eu Kis Gun, Memige Anut uqa ija ijanina sulduadigian eu humei uqa ceteteh cunug iwaladigian. Odimei uqa je cunug ija age maadem eu tulidocob dahiniga qolocigian,” aden.

<sup>27</sup> “Ija ijana malol bilec adigina, wawaga malol bilec eu culiadigina. Mahanadec malol bilec adeginauwe odi qee ija adigina. Wawaga cain qeleleiaunle, dumanaga ha cain culiaunle.

<sup>28</sup> Ija maadem, ‘Ija nuimig ageca ceseli hugen,’ adem eu age doin. Memige Anut uqa ija wooltec bilia. Eunu age ija naluni moubmiqa age ija Memige Anutca tigen ec adem eunu wawaga ceeloub.

<sup>29</sup> Isi ceteh eu caleceb age wawaga meleigiannu ija eu qee calec ninijen je eu wele maadiga,” aden.

<sup>30</sup> “Maha i uqana dana ben uqa hona. Eunu ija je mati bahic ageca haun qee madoqaun. Dana eu uqa ija mateceb odigen eu gagadic odocca qee.

<sup>31</sup> Euqa mahanadec dana age ija Memige Anutnu nalug miginanu dogina eunu Memige uqa je maten eu toodu odigina. Ege jo i qisac-dumeb beleqan. Cajeiga,” aden.

## 15

### *Jisas uqa na wain bahic*

<sup>1</sup> Jisas je haun maaden, “Ija na wain gug bahic. Mei uqa na wain cabi cofdoc dana.

<sup>2</sup> Uqa ijana batac abesabes age aig qee qogina eu qeti heladena. Odocob uqa ijana batac abesabes age aig qogina eu aig meca haun qoqagannu ceteteh me qee cunug batacna nijegina eu soiadena.

<sup>3</sup> Ijana je ija maadem uqa odadeceb age wele soidoc bilegina.

<sup>4</sup> Age ija fagtec bileigale, odocob ija age fagadec biligen. Batac uqa wain gugna qee fagdoc tawecceb aig qocwe qee. Eu odiwe age ija qee fagti taweccebil ageha aig qocwe qee,” aden.

<sup>5</sup> “Ija na wain gug, age wain batac. Age ijaca qee cuhanuc bibili ceteh caunca oso odocwe qee. Eunu oso uqa ija fagtec bilina, odocob ija uqa fagdoc biligina eu uqa aig matica qugian.

<sup>6</sup> Oso uqa ija fagtec qee biligiaqa eu wain batac gauc heleginawe odi uqa helecebil nuigian. Odocob uqa galaligian. Odocob age eu cedi haudumeig jana helecebil cijigian,” aden.

<sup>7</sup> “Age ija fagti biluqagaqa, ijana je ha wawaga fagdoc biligiaqa, wawaga cetehnu madena eu age inondocobil Anut adigian.

<sup>8</sup> Age aig matica qoqagaqa, ijana malogom bahic ha ibuldoqagaqa eu odi odocna ija Mei binan ben wasigian.

<sup>9</sup> Memige Anut uqa ija naluni menawe ija age nalunuga migina. Age ija agenu nalunuga mec euna bileigale.

<sup>10</sup> Age ijana loo je toodu odoqagaqa age ija agenu nalunuga mec euna biluqagan. Eu odiwe ija Meina loo je toodu odiginanu uqa naluni mec euna biligina.

<sup>11</sup> Je eu ija wawi ceeli bilec ageca ligiannu, age wawaga ceeli bilec ihoc bahic ligiannu maadem.

<sup>12</sup> Ijana loo je eu age adigina eu ihen, ‘Ija age nalunuga memwe age nalug mecebmecebi bileigale,’ adigina.

<sup>13</sup> Oso uqa uqana danah hehuladi cal mena, nalug mec eu wooldoc oso qee nijel.

<sup>14</sup> Age je ija maadigina eu toodu odoqagaqa age ijana danah biluqagan.

<sup>15</sup> Cabi dana age agena dana ben odona eu age qee dogina. Eunu qila ija age maadi cabi dana ec qee adigina. Euqa je cunug Mei mateceb dom eu cunug ija age maadecemin doin. Eunu ija age ijana danah ec maadigina,” aden.

<sup>16</sup> “Age ija nesili qee ehitelein qa age belimeig aig qoqagannuca, agena aig qoc eu catanigian-nuca nesili ehadem. Odimig age Memige Anut uqa age ijanina ceteh osonu inondoqagaqa eu cunug adigiannu ija age nesili ehadem.

<sup>17</sup> Ijana loo je adigina eu ihen, ‘Age nalug mecebmecebi bileigale,’ adigina,” aden.

*Mahanadec dana age malogom cad madoqagan*

<sup>18</sup> Jisas je haun maaden, “Mahanadec dana eundec age sagagadoqagaqa eu age ija casac sagagtein eunu cisdoigale.

<sup>19</sup> Age mahanadec biloubmiqa mahana eundec age, age agenagulwe nalunuga moub. Euqa age mahanadec qee bileginaqa ija age mahanadec bibilegin hu nesili cedem. Eunu mahanadec eundec age sagagadegina.

<sup>20</sup> Ija wele maadem:

‘Cabi dana uqa uqana ben qee falic wooldu bilina,’ adem. *(Jon 13.16)*

Je eunu cisdoigale. Age ija aqati tootootein eunu age ageha aqati tootooadoqagan. Age ijana je toodu odoin eunu eundec age agena jeha toodu odoqagan.

<sup>21</sup> Age uqa ija sulten eu qee dogina. Eunu age eu cunug age ija ijaninu odadoqagan,” aden.

<sup>22</sup> “Ija qee hu maadoummiqa agena silail eu dewenega fagdoc bilia ec eu qee doub. Euqa ija hu maadem eunu agena silail jahuldocnu gelac oso qee nijel.

<sup>23</sup> Oso uqa sagagtena eu uqa Meiha sagagdona.

<sup>24</sup> Ija age gemona dana oso wele qee odol eu qee odoummiqa agena silail dewenegana qee biloub. Qilaqa age ijaca Meica fecilimeig sagaglein.

<sup>25</sup> Eu je oso agena loo je jaqecna nijina eu ihoc ligiannu age odi odoin. Je eu odi maden:

‘Age sagagtecnu je silig qee nijel euqa sagagtein,’ en,” aden. *(Buk Song 35.19; 69.4)*

<sup>26</sup> “Euqa Tutuanaga Oc ija Memige Anutna gundec sulduadigen eu mele je madecnu Kis eu humei uqa ijana gugnu je qasali maadigian.

<sup>27</sup> Age age gug qocnadec ijaca bilomnu ageha ijana gugnu je qasali maadoqagan,” aden.

## 16

<sup>1</sup> “Je eu age agena wawaga meleec eu cain culuwainnu ija maadem.

<sup>2</sup> Juda dana age egena cuha jona qee biluwain imeig ititacadi agena gel hibilohu isec madoqagan. Mele, saen oso hugian, saen euna dana

age aqegina eundec ege eu odocna Anutna cabi oqona ec cisdoqagan.

<sup>3</sup> Age Memige Anutnu wawaga qee fogo dol, ijanu ha age wawaga qee fogo dol eunu odi odadoqagan.

<sup>4</sup> Euqa age ceteħ isi cali hocob ija wele maadem, eunu dahiniga cisdoqagannu ija ceteħ eu qee hoc ninijen iina maadem,” aden.

*Jisas uqa Kis Gunna cabinu maaden*

Jisas je haun maaden, “Ija ageca bilomnu ija je eu age sanan mecna qee maadelem.

<sup>5</sup> Qilaqa ija sulten uqaca nuigina, euqa age oso ana nuuguna? ec qee sisiltena.

<sup>6</sup> Qee, ija je i maademnu age dumanaga culec bilegina.

<sup>7</sup> Ija maadigaqa ija mele je maadigina, ija qee nueceminfi Tutuanaga Oc ageca qee hoiaun. Ijaqa ono nuifig suldocomin ageca hugian. Eunu ija nuigina eu age me madecnu nijia.

<sup>8</sup> Odocob uqa humei uqa mahanadec eundec amaga hulelduadigian. Odocob age silailnuca ititom cobocnuca Anutna gesiladecnuca ulauladigian.

<sup>9</sup> Age ijanu wawaga qee meleena eunu silailnu ulauladigian.

<sup>10</sup> Ija Memige Anutca tigena, age ija haun qee mecituwain eunu ititom cobocnu ulauladigian.\*

---

\* **16:10:** Dana mahanadec age Jisas geuldimeig age uqa ititom kobol qee odel eunu uqa cal migian ec madein. Euqa Anut uqa odudeceb uqa cal mecnadec ceseli cajeceb ehudeceb Jisas uqa Anutca bilen. Odon euna Anut uqa dana cajaca cunug Jisas ititom kobol himec odon eunu ihacadena.

11 Maha i uqana dana ben eu dewegnu Anut wele gesildon eunu Anutna gesiladecnu ulauladigian,” aden.†

12 “Ija age je matica maadecnu nijia qa age qila gahidocwe qee.

13 Euqa mele jenu meleecnu Kis eu humei uqadodocnadec je qee maadeiaun qa uqa dah mena eu maadigian. Odimei ceteh hibna caligian euha maadigian. Eunu uqa mele je cunug doqagannu dado madigian.

14 Uqa je ijana nijia eu umei age maadigian. Eunu uqa ija binani suli ugian.

15 Cunug eu Memige Anutna nijia eu ijana nijia. Eunu uqa je ijana nijia eu umei age maadigian ec maadiga,” aden.

*Qila waloc saen caleceb isi waug ceelec saen caligian*

16 Jisas je haun maaden, “Saen nag odi gieceb age ija qee mecituwain. Odocob eu haun nag odi gieceb age ija haun mecituqagan,” aden.

17 Odocob uqana malogom leih age togodudu madein, “Uqa madena, ‘Saen nag odi gieceb age ija qee mecituwain. Odocob eu haun nag odi gieceb age ija haun mecituqagan,’ ena, ‘Ija Memige Anutca tiginanu,’ ena eu cel je madena?” ein.

18 Age madein, “Uqa madena, ‘Saen nag odi gieceb’ ena eu uqana gug ege qee doqona,” ein.

---

† **16:11:** Dana mahanadec cunug age Jisas cal men eu fimeig age Anut uqa geulden ec cisdoim. Euqa Jisas uqa Anut amegna qee geuldec bilina. Anut uqa Jisas cal mena Seten geuldimei uqana gagadic odoc eu cilehdon.

19 Odocobil Jisas uqa age, age uqa sisildocnu cisdodogin feciadime i eunu uqa maaden, “Ija maadiga, ‘Saen nag odi gieceb age ija qee mecituwain. Odocob eu haun nag odi gieceb age ija haun mecituqagan,’ adiga. Age je eu cisdudu togodoginafo?

20 Ija je mele maadigina, age qada u qajoqagan, mahanadec ageqa ceeli biluqagan. Age dumanaga culigian. Euqa age dumanaga culec eu ceeli bilec ibuldugian.

21 Saen caja mel basigiannu deel cali hocob uqa culumen dodon bilina. Euqa mel basime i uqa mel on eunu waug ceelenanu uqa culumen doc eu dahig celena.

22 Ageha odi qila culumen adec bilegina. Ijaqa haun ceseli meciadigen. Odocob age wawaga ceeligian. Agena ceeli bilec eu oso qee cawaladeiaun.

23 Deel euna age sisiltec je oso qee matowain. Ija je mele maadigina, age Memige Anut cetch osonu inondocobilfi uqa eu ija ijanina adigian.

24 Age lili saen qila bilegina ija ijanina Memige cetch osonu qee inondoloin. Age agena ceeli bilec ihoc ligiannu inondocobil eu adeceb oigale,” aden.

*Jisas uqa mahanadec gagadic odoc wooldon*

25 Jisas je haun maaden, “Ija je i age galolo jena maadem. Saen oso hugian saen euna ija galolo jena qee maadigaun. Euqa saen euna ija age Memige Anutnu je camasacna maadigen.

26-27 Deel euna age ija ijanina Memige Anut je inondoqagan. Age ija naluni meginanuca, age



uqa ija Anutnadec hom eunu wawaga meleena euca eunu Memige Anut uqadodoc age nalunuga mena. Eunu ija agenu mimig Memige Anut je inondugen eu qee maadigina.

<sup>28</sup> Ija Memige Anutnadec humig mahana nem. Qila ija maha qisacdumig Memige Anutca ceseli tigina,” aden.

<sup>29</sup> Odocob malogom age Jisas madoin, “Faga, qila hina camasac madagana, hina galolo jena qee madelem!

<sup>30</sup> Ege qila hina ceteh cunug dogona, oso sisil-hecnu hina age adi cisdogina docnu qee nijel eu ege doqona. Eunu hina Anutnadec hom eu ege wawige meleena,” doin.

<sup>31</sup> Odocobil Jisas uqa maaden, “Age qila wawaga meleenafu?”

<sup>32</sup> Feiga, saen hugian, mele saen eu wele bilina, saen euna age cunug ija cuhanuc tawigennu qisacti agena gunna budu beladoqagan. Euqa Memige Anut uqa ijaca tawowona, eunu ija cuhanuc qee tawigina.

<sup>33</sup> Ija je i age ija dunuhna bibili malolca biluqagannu maadem. Age mahana bilecnana wawaga sogoecca biluqagan. Euqa ija maha wooldom eunu age wawaga toogdoiale,” aden.

## 17

### *Jisas uqadodocnu Anut inondon*

<sup>1-3</sup> Jisas uqa je eu madi hedumei uqa sao jobonna tatii imei Anut inondon:

“O Mei, saen eu wele cali hoia. Hina dana mahamaha bilegina cunug Melem ebenna madem. Odimeg cunug uqa utem eundec age cebac bilec catanec eu adecnu gagadic odoc ihoc utem. Cebac bilec catanec uqana gug eu ihen. Age hinanu, hina himec mele Anut eunuca, Jisas Krais hina suldom eu uqanuca wawaga fogo doc bilegina. Eunu hina Melem uqa kobolkobol ihigiannu kobolkobol utugale,” don.

<sup>4</sup> “Ija hina mahana kobolkobol ihem, cabi ija ocnu item, eu ija u hedom.

<sup>5</sup> O Mei! Qila hina amenna kobolkobolca bilec itigale, kobolkobol eu maha qee ifanec nini-jen ija hinaca biloh saen euna ijana bilen eu haun itigale!” don.

*Jisas uqa uqana malogom cesuladecnu Anut inondon*

<sup>6</sup> Jisas haun inondon:

“Dana hina mahanadec ija item eundec ija hina ijain camasac mudiadem. Age hina toinain bilein, euqa hina age ija item. Age hina jejein toodu odoin.

<sup>7-8</sup> Je hina item eu ija age maadem. Age je eu oin, age, ija hinanadec hom eunu mele wawaga fogo don. Age, hina ija sultem eunu wawaga meleena. Eunu qila age ceteh hina item eu cunug hinanadec hon eunu wawaga fogo don,” don.

<sup>9</sup> “Age hina toinain. Eunu ija agenu mimig je inonhigina. Ija mahanadec eundecnu qee inonhigina qa hina item agenu bahic inonhigina.

<sup>10</sup> Ija toinani cunug eu hina toinain. Hina toinain eu ija toinani. Agena odocna ijana kobolkobol camasac mena,” don.

<sup>11</sup> “Qila ina ija mahana qee biligaun. Euqa age mahana bilegina. Ija hinaca ligen. O Mei Gun, hina ijain eu ija item. Eunu ija hinaca ele osol biluwunawe age hina ijain euna wawaga osol biluqagannu hewadagale.

<sup>12</sup> Saen ija age gemona bibili ija hina ijain item euna biluqagannu hewadem. Ija cofadem. Age eundec oso qee fadalelqa Anutna jaqec je nijia eu ihoc ligiannu dana fadalec eu himec uqa fadalec bilina.

<sup>13</sup> Qilaqa ija hinaca tige bili odigina. Odimig ija wawi ceeli bilec ageca ligiannu, age wawaga ceeli bilec ihoc bahic ligiannu je i mahana tatawi mahigina,” don.

<sup>14</sup> “Ija hinana je adem. Ija mahanadec qeewe eu odi ageha mahanadec qee. Eunu age mahanadec qeenu mahanadec eundec age sagagadegina.

<sup>15</sup> Ija hina, age mahana biluwainnu cedadaga ec qee inonhelem qa hina qisol mec dana eu ageca hu waadeiaunnu hewadagale higina.

<sup>16</sup> Ija mahanadec qeewe eu odi age mahanadec qee.

<sup>17</sup> Hinana je eu mele bahic. Eunu hina hinana jena hinanu qaguadaga.

<sup>18</sup> Hina ija mahana necnu sultemwe eu odi ija ageha mahamaha beloqagannu suladem.

<sup>19</sup> Age mele jena hinanu qagu biluqagannu ija ijadodoc hinanu qagugina,” don.

*Jisas uqa dana cajaca wawaga meleecca cunug  
cesuladecnu Anut inondon*

<sup>20</sup> Jisas haun inondon:

“Ija age qila ene tawegina agenu himec qee inonhigina. Euqa hibna age je maadecebil dana filfil ijanu wawaga meleigian eundecnu ha inonhigina.

<sup>21</sup> Mei, hina ija dunuhna biligina, ija hina dunuhna biliginawe eu odi age ele dunuhna bilimeig age cunug wawaga osol migiannu inonhigina. Eunu age odi wawaga osol mi bilecnana mahanadec eundec age hina ija sultem eunu wawaga meleigian.

<sup>22</sup> Hina ijaca osol biluwunawe age cunug osol biluqagannu kobolkobolca bilec hina ija item eu ija age adem.

<sup>23</sup> Ija age dunuhna biligen, hina ija dunuhna bilegan, age deweg osol bahic moqagannu adem. Eu odocna mahanadec eundec age, hina ija sultem eunuca hina ijana eundec nalunuga magana, hina ija naluni maganawe eunu wawaga fogo dugian,” don.

<sup>24</sup> “O Mei! Hina ija item eu ageha ija biligina euna ija gami bileqan eunu ija gale hena. Eunu hina maha qee ifanec ninijen ija naluni memnu kobolkobol item eu age foqagan.

<sup>25</sup> O Mei, hina ititom bahic! Hinana gug bahicnu mahanadec age qee dogina. Ijaqa hinanu dugina. Ene tawegina ageha hina sultem eu age dogina.

<sup>26</sup> Ija hina ijain camasac iwaladem. Odimig hina naluni mec item eu age wawaga dunuhna

biligiannuca, ijaha age dunuhna biligennuca ija hibna camasac iwaladigen,” don.

## 18

*Judas uqa Jisas uqana cad ebenegana muden  
(Matju 26.47-56; Mak 14.43-50; Luk 22.47-53)*

<sup>1</sup> Jisas uqa inondoc i madi hedumei uqa uqana malogom gami Kidron uqana wa sasac leti belein. Cudun euna cabi oso nijen. Odocob Jisas uqana malogom gami dunuh euna lein.

<sup>2</sup> Saen mati Jisas uqana malogom gami ono gulucdadanoig. Eunu Judas uqa Jisas uqana cad ebenegana men eu cabi eu ana isec don.

<sup>3</sup> Eunu Judas uqa Rom agena han dana leih cedadi tempel cebec cofdoc dana leih eu ihanec dana benben Farisica age suladecebil uqa age cedadime i cabi euna ehadi len. Age cejal gowocca hannu cetetehca hewechewec lein. Age cabi duhuh lein.

<sup>4</sup> Jisas uqa cete h cunug uqaca caligian eu dumei uqa cemenega limei sisiladen, “Age in wali cobogina?” aden.

<sup>5</sup> Odocob age jejeg hewi madoin, “Ege Jisas Nasaretdec waloqona,” doin. Odocob Jisas maaden, “Ija uqa,” aden. Judas uqa Jisas uqana cad ebenegana men uqa ono age gami tawein.

<sup>6</sup> Odocob Jisas maaden, “Ija uqa,” aden saen euna age bicbic limeig mahana toni aqen.

<sup>7</sup> Odocobil Jisas uqa haun sisiladen, “Age in wali cobogina?” aden. Odocob age madoin, “Ege Jisas Nasaretdec waloqona,” doin.

<sup>8</sup> Odocobil Jisas maaden, “Ija wele maadi ija uqa adiga. Age ija waliteginafi dana i age ijaca tawoqa age culadecebil beleiga,” aden.

<sup>9</sup> Jisas uqa je oso wele maden:

“O Mei, age hina item eundec oso qee fadalel,” en  
*(Jon 6.39)*

je eu ihoc ligiannu uqa je odi maden.

<sup>10</sup> Odocob Saimon Pita uqa han siginca uqa uqana cudunnadec umei uqa ihanec dana ilo uqana cabi dana qelimei dahig meula isec qeli caguton. Cabi dana eu ijan Malkas.

<sup>11</sup> Odocob Jisas uqa Pita madon, “Hina han sigin uqana cudunna tacaga! Hina wa gab i Memige Anut ija iten eu qee jigaun ec cisdogonafo?” don.

### *Age Jisas Anasca ehudi lein*

<sup>12</sup> Odocob Rom agena han danaca, agena iloca, Juda agena jic cebec cofdoc danaca age Jisas hewi eben libein.

<sup>13</sup> Odimeig age casac Anasna gunna ehudi li mudein. Ge, Anas uqa Kaiafas tanaig. Kaiafas uqa cabi gel euna ihanec dana agena ilo bilen.

<sup>14</sup> Kaiafas uqa wele Juda dana maaden, “Dana osol uqa dana cajaca cunug uqa age hehuladi cal migian eu cois,” aden.

### *Pita uqa Jisasnu qee sasac qon*

*(Matju 26.69-70; Mak 14.66-68; Luk 22.55-57)*

<sup>15</sup> Odocob Saimon Pita uqa malogom osoca ale Jisas toodu cobosin. Malogom oso eu uqa ihanec dana agena ilo eu uqanu du cuhadon. Eunu uqa Jisasca ihanec dana agena ilo uqana gel duhuh lesin.

16 Ale lelesin Pita uqa jic cebec maha gumu isec tawen. Eunu malogom oso ihanec dana agena ilo uqa uqanu du cuhadon eu uqa ceseli calimei jic cebec cofdoc caja Pitanu madon. Odocob uqa Pita ehudi dunuh len.

17 Ale lelesin jic cebec cofdoc caja eu uqa Pita madon, “Hinaha dana eu uqana malogom osofa?” don. Odocob Pita uqa jejeg hewi madon, “Qeeo, ija uqana malogom oso qee,” don.

18 Eu duan saenna. Eunu cabi dana jic cebec cofdoc danaca age ja hudein. Age dewenega ja walac aaden talildu tawein. Pita uqaha euna limei age gami uqa deweg ja walac dodon tawein.

*Ihanec dana agena ben uqa Jisas gesildon  
(Matju 26.59-66; Mak 14.55-64; Luk 22.66-71)*

19 Odocob ihanec dana agena ilo uqa Jisas uqana malogomnuca, uqana je uqa dana iwaladennuca eunu sisildon.

20 Odocob Jisas madon, “Ija dana cunug amagana je maadolig. Ija cuha jonanaca tempelnaca Juda dana cunug cegulegina euna iwaladolig. Ija jahunecna je oso qee madelem.

21 Hina eetanu sisiltagana? Dana ija maadecemin doin eundec sisiladi fagale. Eeta ademnu sisiladaga, age dogina,” don.

22 Jisas uqa odi madocob jic cebec cofdoc dana eu agenadec oso cemenug tatawei uqa siho qahime i madon, “Se, hina eetanu ihanec dana ilo je eu odi madoga?” don.

23 Odocob Jisas madon, “Ija maduga eu me qeefi qasali madaga duga. Euqa ija tutuc madugafi eetanu qitiga?” don.

<sup>24</sup> Odocob Anas uqa Jisas libein eu odi tatawen suldocob ihanec dana agena ilo Kaiafasca len.

*Pita uqa haun Jisasnu qee sasac qon  
(Matju 26.71-75; Mak 14.69-72; Luk 22.58-62)*

<sup>25</sup> Pita uqa ono ja walac dodon tawen. Odocob age madoin, “Hinaha dana eu uqana malogom osofa?” doin. Euqa Pita qee sasac qu maaden, “Qeeo, ija qee,” aden.

<sup>26</sup> Odocob ihanec dana agena ilo uqana cabi dana oso, dana Pita uqa dahig caguton eu uqa waliag oso, uqa Pita sisildu madon, “Ija hina uqaca cabina tatawesin qee fecihelemfo?” don.

<sup>27</sup> Odocob Pita haun qee sasac qu madon, “Qeeo,” don. Odocob saen euna dih mala qon.

*Jisas uqa Pailat amegna tawen*

<sup>28</sup> Odocob qasil bahic age Jisas ehudimeig Kaiafasna gunnadec jo gabman dana ben bilia euna lein. Juda age ege gabman jo locomun Juda dana qee agena gegehin dewenige qageceb Pasowa sab jecwe qee imeig age jona qee telein.\*

<sup>29</sup> Eunu Pailat uqadodoc maha gumu cali numei sisiladi maaden, “Age dana i dewegnu adi um qogina eu madeiga duga,” aden.

<sup>30</sup> Odocob age jejeg hewi madoin, “Uqa qisol mec kobol qee odoubmiqa ege hina ebenna qee moum,” doin.

---

\* **18:28:** Gabman ilo dana Pailatca, uqana eundecca age Rom dana. Age Juda age Anut amegna cataniec bilecnu kobol qee toodu odoloin. Eunu Juda age Rom dana gami bilimeig age Anut amegna gegehincal calowainnu age gabman agena jona qee telein.



<sup>31-32</sup> Odocobil Pailat maaden, “Cois, age dana eu ehudi belimeig agedodoc agena loo jena gesildu feiga,” aden. Odocob Juda age madoin, “Dana oso qocnu eu ege ebenigena qee nijel,” doin.† (Jisas wele uqa adi cal migiannu je maden eu ihoc ligian odon.

<sup>33</sup> Odocob Pailat ceseli uqana jona timei Jisas utadocob ten. Uqa sisildon, “Hina Juda agena Kingfo?” don.

<sup>34</sup> Odocob Jisas jejeg hewi madon, “Sisilec je i hinana cisdocfo, qee leih age ijanu maheinfo?” don.

<sup>35</sup> Odocob Pailat madon, “Hina ija Juda ec cis-dogonafo? Agena sihulca ihanec dana benbenca age ija ebenina miheiga. Hina cel kobol oso odom?” don.

<sup>36</sup> Odocob Jisas jejeg hewi madon, “Ijana cul eu maha inadec qee. Ijana cul maha ina nijoubmiqa ijana tootec age ija Juda ebenegana qee mituwainnu han cadoub. Ijana culqa maha inadec qee!” don.

<sup>37</sup> Odocob Pailat uqa sisildon, “Eu odifiqa hina king osofo?” don. Odocob Jisas jejeg hewi madon, “Hina ija king ec madagana. Gug inu ija basiten, gug inu ija maha ina nem. Ija mele je eu himec qasali maadigennu hom. Mele je madec dana abesabes ija dah mitegina,” don.

<sup>38</sup> Odocob Pailat madon, “Mele je eu eeta?” don.

---

† **18:31-32:** Rom age Juda agena hatu cofdoin. Odocob Juda age agena gesilec jona je tutuc mudecnu eu cois nijen. Euqa Rom age Juda agena gesilec jona dana oso qocobil cal migiannu je madecnu eu cahacadein. Na babalecna tuitu qocobil cal mecnu kobol eu Rom agena kobol himec.

*Pailat uqa age Jisas na babalecna tuitu qoqagan ec maaden*

*(Matju 27.15-31; Mak 15.6-20; Luk 23.13-25)*

Pailat uqa odi madi hedumei Juda dana age maha gumu tatawegin ageca cali limei maaden, “Ija uqa cahuldoc oso qee felem.

<sup>39</sup> Euqa agena kobol oso nijia eu ija Pasowa sab jec saenna gihacdoc dana oso gaid besituadiginanu. Ija Juda agena King besituadigenfo?” aden.

<sup>40</sup> Odocob age utai madoin, “Qee, dana i qee! Hina Barabas besitugaga!” doin. (Barabas uqa heje dana eu uqa dana leih ageceb cal mein.)‡

## 19

<sup>1</sup> Odocob Pailat uqa han dana maadeceb age Jisas ehudimeig lotoc hilitumeig qisadoin.

<sup>2</sup> Odimeig han dana eu age halu dud lalic qumeig king katakat mudimeig gulodutoin. Odimeig age lotoc golca oso tacitumeig

<sup>3</sup> age uqaca limeig lelandudu madoin, “O Juda agena king, feele!” doin. Odimeig uqa siho qahein.\*

<sup>4</sup> Odocobil Pailat uqa Jisas ehudi haun cali limei Juda dana maaden, “Feiga, ija dana i ehudi age ija uqa cahuldoc oso qee felem eu doqagannu age cemenega mudiga,” aden.

<sup>5</sup> Odocob Jisas uqa lotoc golca dud lalicca king katakat tacitobil cali hon. Odocob Pailat maaden, “Feiga, dana eu ihen!” aden.

---

‡ **18:40:** Doc dana mati age Barabas eu dana age Rom Judia hatunadec ititacadeenu gale aden eundec oso ec cisdogina. \* **19:3:** Age je Matju 27.29 feiga.

<sup>6</sup> Saen ihanec dana benbenca tempelna cofdoc danaca age Jisas fimeig hihibanaga teceb eui madoin, “Na babalecna tuitu qoga! Na babalecna tuitu qoga!” doin. Odocobil Pailat maaden, “Ija uqa cahuldoc oso qee felem! Age ehudimeig agedodoc na babalecna tuitu qoigale,” aden.

<sup>7</sup> Odocob Juda age jejeg hewi madoin, “Uqa maden, ‘Ija Anut Melah,’ en. Eunu egena loo je oso nijia, eu cal migian ec maden!” doin.

<sup>8</sup> Age je eu madocobil Pailat eu dah mimei uqa ben cucuien.

<sup>9</sup> Odimei uqa haun ceseli uqana jona limei Jisas sisildon, “Hina anadec hom?” don. Odocob Jisas uqa Pailat jejeg qee hewel.

<sup>10</sup> Odocob Pailat madon, “Hina jejeni qee hewagaunfo? Ija maadecemin age na babalecna tuitu qihimeig caqusihecebil caculimeg cal megan eu ebenina nijia. Ija maadecemin age cufalihoqagan euha ebenina nijia, eu qee dogonafo?” don.

<sup>11</sup> Odocob Jisas uqa Pailat jejeg hewi madon, “Gagadic odoc eu Anut qee ihoubmiqa hina maadeceb na babalecna tuitu qee qitoub. Eunu dana uqa ija hina ebenna miten eu uqana silail hinana silail wooldona,” don.

<sup>12</sup> Je eu madocob uqa Jisas besitocnu jic walen. Euqa Juda dana age eui madoin, “Oso uqanel ija king ena eu uqa Sisana cad. Eunu hina dana eu cufaldufeg hina Sisana danah qee biligaun,” doin.

<sup>13</sup> Age je eu madocobil Pailat dumei uqa Jisas ehudimei cudun ijan “Cobocnu Meen,” age Aram jena Gabata egina euna limei gesildocnu bilecna bilen.

<sup>14</sup> Deel eu Pasowa ja qocnu saciadoc deel, cam wele ohis ten. Uqa Juda dana maaden, “Agena king ihen!” aden.

<sup>15</sup> Odocob age utai madoin, “Qocom cal meia! Qocom cal meia! Na babalecna tuitu qoga!” doin. Odocobil Pailat sisiladen, “Ija agena king na babalecna tuitu qugenfo?” aden. Odocob ihanec benben jejeg hewi madoin, “Egena king osol bilia, eu Sisa,” doin.

<sup>16</sup> Odocobil Pailat uqa Jisas age na babalecna tuitu qumeig caqusecebil caculimei cal migiannu ebenegana culiaden.

*Age Jisas na babalecna tuitu qumeig caqusecebil caculen*

*(Matju 27.32-44; Mak 15.21-32; Luk 23.26-43)*

Eunu age Jisas na babalecna tuitu qoqagannu oin.

<sup>17</sup> Jisas uqa uqana na babalec gahidumei cali li nuen. Nuimei uqa “Ilo Gatic Cudun,” egina, age Aram jena “Golgota,” egina euna len.

<sup>18</sup> Ono age uqa na babalecna tuitu qumeig caqusecebil caculen. Age dana lecisha ale Jisas cemenug na babalecna tuitu aqalimeig caqusecebil caculesin. Oso naha isec caculen, oso naha isec caculen. Jisas uqa ale gemona caculen.

<sup>19</sup> Pailat je osoha jaqen. Odimeis uqa na babalec ohisna qon. Jaqec je eu maden, “Jisas Nasaretdec, uqa Juda agena king,” en.

<sup>20</sup> Cudun age Jisas na babalecna tuitu qoin eu Jerusalem cemenug nijen. Odocob age je eu Hibuca, Latinca, Grikca agena jena jaqein. Eunu Juda dana cajaca mati age je eu sanijein.

<sup>21</sup> Odocob Juda ihanec dana benben age Pailat madoin, “Hina ‘Juda agena king’ ec cain jaqagaun qa hina ‘Dana i maden, “Ija Juda agena king,” en’, je eu odi jaqaga,” doin.

<sup>22</sup> Odocobil Pailat jejenega hewi maaden, “Je eu ija jaqiga ija jaqiga,” aden.

<sup>23</sup> Odocob han dana age Jisas na babalecna tuitu qu hedumeig age uqana lotoc ceteteh ced-imeig age am 4-pela mein. Han dana cunug age osolosol siwiadein. Odimeig age uqana lotoc bagac cecelac tacen euha siwiadaqaga bili odoinqa eu lotoc osol mudein. Ilonadec nu jaihna calen eu gisecca qee.

<sup>24</sup> Eunu age togodudu madein, “Gec, ege cain baladoqaun. Ege satu qelimeb in uqa ugian eu fecnu,” ein. Anutna jaqec je oso ihoc ligiannu age odi odoin. Anutna jaqec je eu odi maden:

“Age ijana lotoc agedodoc gemona qatani siwiadein.

Odimeig ijana lotoc ocnu satu qelein,” en. *(Buk Song 22.18)*

Eunu han dana age odi odoin.

<sup>25</sup> Euqa Jisasna na babalec cemenug eu uqa anagca anag waliagca, Maria eu Klopas aidegca, Maria Makdaladecca age tawein.

<sup>26</sup> Odocob Jisas uqa anagca uqana malogom uqa culaug on uqaca ale cemenug tatawesi fimeu uqa anag madon, “O caja, faga, uqa hina melem,” don.

<sup>27</sup> Odimeu uqa uqana malogom eu madon, “Faga, uqa hina anin,” don. Saen euna malogom eu uqa ehudeceb beli uqana gunna uqaca bilesin.

*Jisas uqa cal men*

*(Matju 27.45-56; Mak 15.33-41; Luk 23.44-49)*

<sup>28</sup> Eu hedocob Jisas uqa ceteħ cunug eu qee mi hedon eu dumei uqa Anutna jaqec je eu ihoc ligiannu maden, "Ija wa gab tena," en.

<sup>29</sup> Boh oso wain gulihinca am bec eu ono bilen. Eunu age gege oso umeig eu bohna wain gulihinca tanumeig na oso, ijan hisop, euna gihac-dumeig sulecebil ti uqa cona mein.

<sup>30</sup> Odocob Jisas uqa wain eu sugudu jimei maden, "Eu qee meia," en. Odimei uqa ilo du qahimei kis umei cal men.

*Han dana oso Jisas qeih sawalna qon*

<sup>31</sup> Deel eu Juda cuha deel saciadocnu deel. Cuha deel eu gun bahic. Eunu Juda dana age deel euna dwenega ganac eu na babalecna caculi tawoqagannu qee gale adel. Odocob Juda dana age Pailat uqa culadeceb han dana age dana age na babalecna aqein eu jaimaga qahecebil mahuc cal mecebil age dwenega ganac na babalecnadec cedi mahana tonimeig ehadi nuecnu cesusdoin.

<sup>32</sup> Odocob han dana age limeig dana oso age Jisas gami na babalecna aqein eu casac jaih qahitoin. Odimeig age dana osoha jaih qahitoin.

<sup>33</sup> Euqa age Jisas cemenug humeig uqa wele cal men eu fein. Eunu age uqa jaih qee qahelein.

<sup>34</sup> Euqa han dana eundec oso uqa uqana sawal Jisas qeihna qon. Odocob mahuc golac waca cali hu busalen.

<sup>35</sup> Dana oso uqa eu odi caleceb fimei uqa eunu amagana qasali maaden. Uqana qasali maadec

eu mele bahic. Ageha wawaga meleigiannu uqa je mele madena eu uqa dona.†

<sup>36</sup> Anutna jaqec je oso ihoc ligiannu age odi odoin. Jaqec je eu odi maden:

“Age uqana teful oso qee qahitowain,” en. (*Kisim Bek 12.46; Namba 9.12; Buk Song 34.20*)

<sup>37</sup> Anutna jaqec je osoha eu odi maden:

“Age dana uqa sawal qeihna qoin eu mecidoqagan,” en (*Sekaraia 12.10*)

eu ihoc ligiannu age odi odoin.

*Age Jisas deweg ganac meen hatin haun osona heel cisein*

(*Matju 27.57-61; Mak 15.42-47; Luk 23.50-56*)

<sup>38</sup> Eu hedocob Josef uqa Arimatiadec uqa Jisas deweg ganac ehi nuigiannu Pailat sisildon. Josef uqa Jisasna malogom oso qa uqa Juda dana agenu cucuiennu uqa malogom oso jahuni bilen, camasac Jisas qee toodol. Odocob Pailat cois ec madocob uqa limei uqana deweg ganac ehi nuen.

<sup>39</sup> Nikodimasha, uqa wele witic osona Jisasca leceb je makesin, uqa gilic dedeman meca na ganac cucusec euca ahewi hon. Uqana culumen eu 30 kilo odi.‡

<sup>40</sup> Dana lecis eu ale Jisas deweg ganac umesi Juda agena kobolna dana heel cisadogina eu odi toodu odosin. Ale deweg ganac lotoc senenecna

---

† **19:35:** Jon 19.26-27 eu malogom Jisas uqa culaug on eu uqa na babalec cemenug tawen ec madena. Eunu dana uqa golac waca cali hu busalen eu fen eu malogom i eu odi fena. ‡ **19:39:** Eu culumen ben bahic. Juda age gilic dedeman meca ben eundec dana uqa king heel cisoloig.

jeludodosi gilic dedeman meca na ganac cucusecca deweg joudesin.

<sup>41</sup> Cudun age Jisas na babalecna qoin euna cabi oso nijen. Cabi euna meen hatin oso age dana oso qee heel ciselein eu nijen.

<sup>42</sup> Eunu Juda Pasowa Sab Jec Ben Deel saciadocnuca meen hatin heel cisec eu cemenug nijen eunu ha ale Jisas deweg meen hatin euna mudesin.

## 20

### *Jisas ceseli cajan*

*(Matju 28.18; Mak 16.1-8; Luk 24.1-12)*

<sup>1</sup> Pasowa Sab Jec Ben cuha deel hedocob cuhana deel osahicdocna Maria Makdaladec uqa qasil bahic cam mamahon meen hatin age Jisas deweg mudein euna hon. Uqa meen koldoc ben age meen hatin gubodoin meen eu wele qosocdon ninijen fen.

<sup>2</sup> Uqa eu fimei ceseli gudugudui Saimon Pitaca malogom osoca Jisas uqa culaug oloi aleca limei maalen, "Age Tibud meen hatinnadec oigan. Age uqa ana mudeigan eu qee doqona!" alen.

<sup>3</sup> Odocob Pita uqa malogom osoca calimesi meen hatinna belesin.

<sup>4</sup> Ale lecis guguli nunuesin qa malogom oso uqa mahuc gugulimei Pita wooldon. Odimei uqa casac meen hatinna calen.

<sup>5</sup> Uqa jogoimei lotoc senenec jeldoin eu ninijen fen qa uqa dunuh qee lel.

<sup>6</sup> Odocob Saimon Pita uqa hib toodu hon. Odimei uqagul meen hatin dunuh len. Uqa lotoc senenec jeldoin eu ono ninijen fen.



<sup>7</sup> Lotoc nag age Jisas ilo jeldoin eu lotoc senenec deweg jeldoin euca ninijesin qee fecialel qa lotoc nag eu col qu filec ninijen fen.

<sup>8</sup> Odocob malogom oso, uqa uqa casac meen hatinna calen eu, uqaha dunuh len. Uqa ceteu cunug fimeu waug meleen. (

<sup>9</sup> Ge, age saen euna Anutna jaqec jena oso taweia eu uqa cal mecnadec ceseli cajigian ec madena eu age wawaga qee fogo dol.)

<sup>10</sup> Odocob malogom eu ale ceseli jobon belesin.

*Maria Makdaladec uqa Jisas fen  
(Matju 28.9-10; Mak 16.9-11)*

<sup>11</sup> Euqa Maria uqa maha gemo meen hatin cemenug qaqaji tawen. Uqa qaqaji bili jogoi meen hatin eu dunuh mecién.

<sup>12</sup> Odimeu ensel leci lotoc senenec tacesin ale Jisas deweg ganac nijenna bibilesin eu fecialen. Oso Jisas ilo nijenna bilen, oso Jisas jaih nijenna bilen.

<sup>13</sup> Odocob ale uqa sisildu madosin, “O Caja, hina eetanu qajagana?” dosin. Odocobil jehenela hewi maalen, “Age ijana Tibud hewi ahudi beleigannu qajigina. Age uqa ana mudeigan eu qee dugina!” alen.

<sup>14</sup> Odi mamadi falicdumeu uqa Jisas ono tatawen fen qa uqa Jisas eu qee dol.

<sup>15</sup> Odocob Jisas uqa sisildu madon, “O Caja, hina eetanu qajagana? Hina in walagana?” don. Uqa, uqa cabi cofdoc dana imeu madon, “O Ben, hina uqa hewi ahudi belifeg uqa ana mudegan eu mataga. Odocom ija nuimig uqa ugen,” don.

<sup>16</sup> Odocob Jisas uqa madon, “Maria!” don. Uqa falicdocob Aram jena madon, “Rabonai!” don. (Uqana gug eu “Iwalgec.”)

<sup>17</sup> Odocob Jisas uqa madon, “Ija Memige Anutca ceseli ohis qee tec nijia. Ija cain hewitigaun. Euqa ija cotielca limeg maadaga, ‘Ija Meica age Memegaca, ijana Anutca agena Anutca cemenug tigina,’ adaga,” don.

<sup>18</sup> Odocob Maria Makdaladec nuimei malogom maaden, “Ija Tibud figa,” adimei uqa je cunug Jisas uqa madon eu maaden.

*Jisas uqana malogom age Jisas fein*

<sup>19</sup> Deel eu cuha deel osahicdocna wesu euna malogom age osoben gabandumeig age Juda dananu cucuieinnu jo jic cebec menadein tatawen bilein. Saen euna Jisas uqa humei age gemona tawen. Uqa maaden, “Malol ageca biliale,” aden.

<sup>20</sup> Odi mamadei uqa ebenca qeihca ihacaden. Odocob malogom eu age Tibud feinnu wawaga ceelen.

<sup>21</sup> Odocob Jisas uqa haun maaden, “Malol ageca biliale. Memige Anut ija sultenwe eunu ija age suladigina,” aden.

<sup>22</sup> Odi madi hedumei uqa agena siw umei fuaadi maaden, “Kis Gun oigale.

<sup>23</sup> Age dana cajaca agena silail dahiniga celecbfi Anut uqaha dana cajaca agena silail dahig celigian. Ageqa dana cajaca agena silail qee dahiniga celecbfi Anut uqa dana cajaca agena silail qee dahig celeiaun,” aden.

*Tomas uqa Jisas fen*

<sup>24</sup> Malogom 12-pela eundec oso, Tomas (age Didimas egina),\* uqa Jisas hon euna uqa age gami qee bilelein.

<sup>25</sup> Eunu malogom leih age madoin, “Ege Tibud fom!” doin. Euqa Tomas maaden, “Ija tuitu age ebenna qoin eu hulufan qee fifig ija ebeni hulufan euna qee hewi fifig ija ebeni uqa wailoh hulufan euna qee hewi fifig ija wawi qee meleeiaun,” aden.

<sup>26</sup> Cuha osol hedocob malogom age haun jo euna cegulein. Tomas uqa age gami bilein. Jic cebec cunug eu jic menadein tatawegin qa Jisas hu age gemona tawimei maaden, “Malol ageca biliale,” aden.

<sup>27</sup> Odimei uqa Tomas madon, “Hina eben ahu ija ebeni hulufanina hewiti fagale. Hina eben ahu ija wailomi hulufanina hewi fagale. Wawin meleec cain felacudugaun, euqa wawin meleeia!” don.

<sup>28</sup> Odocob Tomas uqa jejeg hewi madon, “O ijana Tibud! Ijana Anut!” don.

<sup>29</sup> Odocob Jisas uqa madon, “Hina ija fecitaganu wawin meleeiafo? Age ija qee fecitec bibileig wawaga meleena eu age wawaga ceelec biluqagan!” don.

### *Buk i uqana gug*

<sup>30</sup> Jisas uqa uqana malogom amagana kobolkobol odoc matica filfil odon eu ija buk ina qee jaqelem.

<sup>31</sup> Euqa Jisas uqa Anutna Kraisa uqa Anut uqana dana caha cahaadecnu wele nesili ehudennuca,

---

\* **20:24:** Didimas ijanna gug eu “Mel Gah.”

uqa Anut Melahnuca wawaga meleigian eunu ija ceteteh inu je jaqadiga. Eunu age wawaga meleceeb uqa ijanna cebac bilec oqagan.

## 21

### *Jisasna malogom 7-pela age Jisas fein*

<sup>1</sup> Eu hedocob Jisas uqa uqana malogom Taibirias macas lanna amagana haun camasac men. Uqa odi camasac men.

<sup>2</sup> Saimon Pitaca Tomas, age Mel Gah egina, uqaca, Nataniel, uqa Kena jobondec Galili hatuna, uqaca, Sebedi melahul lecisca, malogom lecishaca age osoben bilein.

<sup>3</sup> Odi bibileig Saimon Pita uqa malogom eu maaden, “Ija cul dool cedigennu cobigen,” aden. Odocob age madoin, “Odocomfi ege hinaca cedecnu cobeqan,” doin. Age odi belimeig wag tobi macasnadec cul dool cedecnu cabi oin. Euqa witic euna cunug cabi oogin cul dool osol oso qee oloin.

<sup>4</sup> Qasil walag dadanen Jisas lanna tawen. Ageqa Jisas tutuc qee felein, age uqa ec qee doloin.

<sup>5</sup> Odocob uqa maaden, “Melamiel, age cul dool oso cedeinfo?” aden. Odocob age madoin, “Qeeo,” doin.

<sup>6</sup> Odocobil uqa maaden, “Agena cimec ben wag eben meulana isec heleiga. Odimeig age leih cedoqagan,” aden. Odocob age cimec ben helecebil gotoen. Odocob age cul dool mati bahic cimec ben euna lecebil age cimec ben didocobil becwe qee.

<sup>7</sup> Malogom oso Jisas uqa culaug on eu Pita madon, “Tibud ono taweia!” don. Pita uqa Tibud ono taweia ec madeceb dumei uqa uqana lotoc cecelac taqimei tefacdu wana tonen. Ge, uqa cabi ocnu lotoc cecelac hulimei lotoc nag taqen.

<sup>8</sup> Malogom leih age wagna li cimec ben cul dool am bec eu didudu lan cemenug ceceli ahoin. Ge, age wag hatai tatawen bibileig cul dool cedein, eu 100 mita odi.

<sup>9</sup> Age wagnadec lanna tonimeig age calos jana cul dool manec ninijen bred ha ono fein.

<sup>10</sup> Odocob Jisas maaden, “Age cul dool qila cedeiga eundec osooso cedi ahoiga,” aden.

<sup>11</sup> Odocob Saimon Pita uqa wag tobimei cimec ben didocob lanna hon. Cimec eu cul dool benben am bec. Cul dool cedein eu sanijein eu 153 odi cedein. Eu mati bahic mele euqa cimec ben eu qee tatalel.

<sup>12</sup> Odocob Jisas maaden, “Age humeig sab jeigale,” aden. Uqa maadecebqa age uqa sisildu hina in docnu oso qee cisdol. Age cunug eu Tibud age du cuhadoin.

<sup>13</sup> Jisas uqa age cemenega limei bred eu umei feni siwiaden. Odimei cul doolha siwiaden.

<sup>14</sup> Jisas saen euna malogom amagana camasac men eu cal mecnadec cajimei uqana camasac mec cijeddon.

*Jisas uqa Pita madon, “Hina ijana sipsip sab joqagannu cofadagale,” don.*

<sup>15</sup> Age sab ji hedocobil Jisas uqa Saimon Pita madon, “Saimon, Jon melah, hina ene bilegina eundec cunug wooladi ija naluni maganafo?”

don.\* Odocob Pita uqa Jisas jejeg hewi madon, “O Tibud, mele, ija hina nalunin migina eu hina dogona,” don. Odocob Jisas madon, “Hina ijana sipsip sab joqagannu cofadagale,” don.

<sup>16</sup> Odimei Jisas uqa Pita sisildu lecisdu madon, “Saimon, Jon melah, hina ija naluni maganafo?” don. Odocob Pita uqa Jisas jejeg hewi madon, “O Tibud, mele, ija hina nalunin migina eu hina dogona,” don. Odocob Jisas madon, “Hina ijana sipsip ben moqagannu cofadagale,” don.

<sup>17</sup> Odimei Jisas uqa Pita sisildu cijeddu madon, “Saimon, Jon melah, hina ija naluni maganafo?” don. Odocob Pita uqa Jisas sisildu cijeddu madon, “Saimon, Jon melah, hina ija naluni maganafo?” donnu waug culumen docob madon, “O Tibud, hina ceteteh cunug dogona, ija hina nalunin migina eu hinaha dogona,” don. Odocob Jisas madon, “Hina ijana sipsip sab joqagannu cofadagale,” don.

<sup>18</sup> “Ija je mele mahigina, hina mel haun bilem saen euna hinadodoc hinana oologam tacimeg euna euna cobigen imeg euna cobom. Euqa hina toia memem hina eben suladecem oso hinana oologam taqihimeig cudun hina qee gale hena euna ehi li mihuqagan,” don.

<sup>19</sup> (Jisas uqa Pita adidihna cal mimi Anut binan suligian eunu nijen eu dado mudecnu je i madon.) Odi madumei Jisas madon, “Hina ija tootaga!” don.

---

\* **21:15:** Grik jenadec falicdocnu je osoha nijia eu odi: “Saimon, Jon melah, hina ija naluni magana eu ene bilegina eundecnu nalunuga magana wooldonafo?” don.

*Malogom oso Jisas uqa culaug oloi eu uqana je*

<sup>20</sup> Odocob Pita uqa qaalimei malogom oso Jisas uqa culaug on eu uqa Jisas toodu hohon fen. Malogom eu uqa Pasowa sab jecna Jisasca duculdod bilimesi uqa Jisas sisildu madon, “O Tibud, in hinana cad ebenegana mihigian?” don.

<sup>21</sup> Pita uqa eu fimei Jisas sisildon, “Tibud, dana i eeta oduduqagan?” don.

<sup>22</sup> Odocob Jisas uqa Pita madon, “Ija madecem-infi uqa bibileb li ija ceseli hoc saenna biligian eu ijana himec, hinana qee. Hina ija tootaga!” don.

<sup>23</sup> Jisas uqa Pita madonnu malogom cunug age malogom eunu madi, uqa qee cal meiaunnu maden eu doin. Euqa Jisas uqa malogom inu uqa qee cal meiaun ec qee madel, uqa madon, “Ija madecem-infi uqa bibileb li ija ceseli hoc saenna biligian eu ijana himec, hinana qee,” don.

<sup>24</sup> Malogom eu uqa ceteteh inu amagana qasali maadena. Uqa ceteteh inu jaqena. Ege uqana je qasali maadec eu mele ec doqona.

*Cit qoc je*

<sup>25</sup> Jisas uqa ene jaqec je nijina eu himec qee odol, uqa ceteteh mati bahic odon. Age Jisas odon eu osolosol cunug bukna jaqoubmiqa ija cisdugina mahamaha ege biluquna cunugna buk mati bahic eu mudecnu cudun ihoc qee.

**BAL CEHEC JE HAUN**  
**Genesis and the New Testament in the Amele**  
**language of Papua New Guinea**  
**Buk Stat na Nupela Testamen long tokples Amele long**  
**Niugini**

copyright © 1997 Wycliffe Bible Translators, Inc.

Language: Amele

Contributor: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

1997-01-01

---

PDF generated using Haiola and XeLaTeX on 18 Apr 2025 from source files dated 31 Aug 2023

efcfe8ba-c483-58bb-922c-05455e0b9491